


B
128
L83L53
V. 1





陸子學譜

無怒軒藏板

序

昔朱文公與呂成公作近思錄記濂洛諸君子之言者也文公又獨爲伊雒淵源錄記諸君子之行因以及其所教之弟子以證其所行者也顧言與行分而爲二視論孟所記若有間矣孔子教人自謂無行不與孟子論君子之所以教者五答問特其一耳慈湖楊氏簡作陸子行狀謂先生授徒即去今世所謂學規者而諸生善心自生容禮自莊雍雍于于後至者相觀而化蓋以言教不如以身教求先生之學者或分言

與行而二之豈有當哉雖然先生之教無方而
學者所從入則不可以無其方也先生之教思
雖無窮而淵源所及確乎可指目者自有其人
不可得而誣也紱自早歲即知嚮往牽於俗學
玩物而喪志三十餘年矣再經罷廢困而知反
盡棄宿昔所習沉潛反復於先生之書自立課
程從事於先生所謂切己自反改過遷善者五
年於茲於先生之教粗若有見焉獨學無友不
敢自信今歲萬子字兆奉

召還朝相見之次叩其近業心同理同若同堂而共

學也既而同事書局時相考証益著益明乃敢
抄撮先生緒言併其教思所及共爲一書名曰
陸子學譜蓋兼用近思淵源二錄之體先生之
言與行畧備其淵源所及亦十得五六視黃氏
宗義所爲象山學案頗加廣焉將以藏諸名山
傳之其人俾有志於希聖者門徑可循歸宿有
所不沉溺於紛華不泛濫於章句庶幾斯道有
絕而復新之日矣乎吾與萬子既幸晚而有聞
同守斯編歲寒相勉若道聽塗說之流未嘗身
習其事咕咕然動其喙所不計也雍正壬子仲

冬穆堂學人李紱書於京邸之無怒軒

陸子學譜目錄

卷之一

辨志

求放心

講明

踐履

卷之二

定宗仰

闢異學

卷之三

讀書

爲政

卷之四

友教

卷之五

家學

陸從政九思

陸處士九敘

陸修職九臯

陸梭山先生九韶

陸文達公九齡

陸山堂先生煥之

陸安撫持之

弟循之

陸仲時麟之

陸伯蕃樞之

陸進士濬

陸家長沖

陸學士泓

陸叅議筠

附

卷之六

弟子一

楊文元公簡

卷之七

弟子二

袁正獻公燮

沈端憲公煥

舒文靖公璘

兄琥弟琪

卷之八

弟子三

徐文忠公誼

蔡文懿公幼學

羅文恭公點

戴文端公溪

李參政性傳

呂寺丞祖儉

邵機宜叔誼

楊漕使楫

陳蕃叟武

卷之九

弟子四

劉少保伯正

項龍圖安世

傅通守夢泉

族人聖謨仲昭齊賢克明附

包少師揚

兄約弟遜

卷之十

弟子五

傅主簿子雲

劉太博堯夫

朱少府桴

弟泰卿

胥必先訓

吳伯顥顥若

弟厚若叔有誠若

張輔之商佐

黃郡守裳

周廉夫清叟

熊鑑附

路彥彬謙亨

朱幹叔克家

弟益叔

彭世昌興宗

吳僉判景立

卷之十一

弟子六

曾孟博滂

子極

林秘書夢英

鄧節推約禮

晁道州百談

徐澧州子石

俞撫幹廷椿

嚴知丞滋

游知丞元

嚴松年松

鄒奉議斌

孟運判渙

饒長者延年

吳進士元子

章從軒節夫

張文學孝直

董心齋德修

李監院肅

子信

趙主簿端頤

卷之十二

弟子七

趙進士師雍

弟師藏

胡季隨大時

郭醇仁震

石應之崇昭

兄斗文

高教授宗商

高郡守商老

詹宗丞阜民

王宗丞遇

許教授中應

楊漕使方

陳晉卿綰

孫僉判應時

胡達材拱

弟搏

潘倉使友文

卷之十三

弟子八

李成州修已

子義山

王進士允文

陳廣文剛

萬正淳人傑

曹立之建

弟挺之廷

利進士元吉

倪濟甫巨川

曾宅之祖道

李伯敏敏求

毛剛伯必强

朱忠甫之瑜

張季悅衍

宋秀才復

鄧文苑遠

張誠子明之

毛元善文炳

符舜功敘

符復仲初

黃達材枏

弟椿棐

吳雲錦紹古

卷之十四

弟子九

邵中孚

張行已

劉敬夫

劉定夫

張少石

張伯强

周伯熊

周孚先

桂德輝

周元忠

黃日新

劉伯協

劉伯固伯文

黃循中

陶贊仲

許昌朝

劉溪父造

豐宅之

諸葛誠之

兄受之

邱元壽

曾敬之

徐仲誠

曾友文

繆文子

張次房

曾充之

鄭學古

劉季蒙

周康叔

程敦蒙

江泰之

郭邦逸

兄邦瑞

朱季繹

羅章夫

卷之十五

弟子十

吳顯仲

馮傳之

鄭總領湜

趙景昭

張季忠

葛少良

劉志甫

顏子堅

李季遠

廖幼卿
兄懋卿

李伯誠

張元度

劉仲復

陳去華

劉德固

馮元質

陳師淵

倪伯珍

祝才叔

李德章

吳君玉

趙子新

童伯虞

喬德占

胡無相

章元錫

倪九成

李叔潤

蔡公辨

吳文學恂

李將使雲

卷之十六

門人上

包文肅公恢

袁正肅公甫

兄肅及馮興宗周之德附

陳侍郎瑄

子蒙

錢秘閣時

從子允文

羅寶章必元

鄧侍郎泳

饒秘監應子 弟應龍

羅運判愚

趙郡王希館

趙忠憲公與篋 從弟與明

吳叅政淵

吳丞相潛

徐都曹愿

卷之十七

門人下

袁太師韶

楊叔謹恪

趙冢宰彥懌

葉秘書夢得

鄒知丞近仁 子曾

宋修叔林

孫進士誼

傅正夫佺

黃璧林應龍 李子愿
柏純父

劉應之林

葉貢士祐之

曾定遠熠

張渭叔渭

弟清叔汾

孫明仲

王子庸

李元白

羅子有

鄧夢真

汪行簡

戴泳

朱元龍

胡謙

胡誼

竺耕道

呂人龍

洪揚祖

舒津

薛王成

曹叔達夙

鄒貢士夢遇

舒裕甫益

洪茶陵簡

曹少府正

方成大溥

吳和仲墳

馬主簿樸

鍾國錄宏

樸從子應之

陳文定公宗禮

桂待制萬榮

馬莊敏公光祖

文樞密及翁

私淑上

吳文正公澄

孫平章當

吳氏弟子門人

虞文靖公集

兄采

虞別駕槃

元文敏公明善

董忠宣公士選

李忠文公黼

趙編修弘毅

黃待制俾

李學正長翁

皮僉判潛

袁進士明善

康山長震

楊徵君準

王西齋梁

黎教授仲基

黃徵君極

黃博士伯遠

吳教授臯

丁大使儼

包忠文希魯

次子宏門人傳箕
王槐友人焦位

柳雲卿從龍

李伯宗本

包仲邳淮

徐山長基

黃敎諭盅

朱徵君夏

王伯達章

戈伯敬直
弟宜

張伯固恒

吳先生弟子
見文集者附

鮑省元恂

江東先生吳儀

趙徵君沔

卷之十九

私淑下

陳靜明先生苑

陳氏弟子門人

李徵君存

祝經歷蕃

吳尊光謙

舒元易衍

閔仲魯

曾子翬振宗

張學士翥

危學士素

子从

余文學幾

張孟循率

王監稅埏

李仲公先生弟子見文集者附

趙寶峰偕

楊徵君芮

桂教授同德

桂長史彥良

春風先生烏本良

弟斯道

鄭待制玉

卷之二十

附錄

宋史本傳

行狀

謚議

文集序

祠堂書院諸記

後學辯論

陸子學譜卷之一

南昌萬承蒼訂

後學臨川李紱編

平越王士俊校

辨志

戴記稱官先事。士先志。故陸子教人以辨志爲入門始事。志之不辨。則此心茫無定嚮。豈能有造於聖學哉。志惡乎辨。義與利而已。孔子以此分君子小人。孟子以此別舜蹠。世之習而不察者多矣。陸子鹿洞講義。聞者至於泣下。則辨之不早辨也。故述陸子辨志之說。爲學譜首焉。陸子論志於道云。士之於道。由乎己之學。然無志則不能學。不學則不知道。故所以致道者。在乎學。所以爲學者。在乎志。

陸二學言
夫子曰。吾十有五而志于學。又曰。士志於道而耻惡衣惡食者。未足與議。孟子曰。士尚志。與志於道一也。

語錄記。盱江傅子淵云。夢泉向來只知有舉業。觀書不過資意見耳。後因困志知反。時陳正己自槐堂歸。問先生所以教人者。正己曰。首尾一月。先生諄諄只言辨志。又言古人入學一年。早知離經辨志。今人有終其身而不知自辨者。是可哀也。夢泉當時雖未領畧。終念念不置。一日讀孟子公孫丑章。忽然心與相應。胸中豁然蘇醒。歎曰。平生多少志念精力。却一切著在功利上。自是始辨其志。雖然如此。猶未知下手處。及親見先生。方得個入頭處。先生嘗云。傅子淵自此歸其家。陳正己問之曰。陸先生教人何先。對曰。辨志。復問曰。何辨。對曰。義利之辨。若子淵之對。可謂切要。

詹子南記先生語云。阜民癸卯十二月初見先生。不能盡記。所言大旨云。凡欲爲學。當先識義利公私之辨。今所學果爲何事。人生天地間。爲人自當盡人道。學者所以爲學。學爲人而已。非有爲也。先生語李敏求云。人惟患無志。有志無有不成者。然資稟厚者。必竟有志。吾友每聽某之言。如何。敏求曰。每聞先生之言。茫然不知所入。幼者聽而弗問。又不敢躡等。先生云。若果有志。且須分別勢利道義兩途。某之所言。皆吾友所固有。且如聖賢垂教。亦是人固有。豈是外面把一件物事來贈吾友。但能悉爲發明天之所以。予我者如此。其厚如此。其貴不失其所以爲人者耳。敏求問云。日用常行去甚處。下工夫。先生云。能知天之所以。所以予我者。至貴至厚。自然遠非僻。惟正是守。

先生與趙然道第三書云黃循中不無尊師重道之誠而家庭牽制不克自遂其質固自通爽而殊乏剛強深懼其汨沒於世習而不能以自立故前書稍振翼之耳富貴利達之不足慕此非難知者仙佛之徒拘曲之士亦徃徃優於斷棄而弗顧視之彼既自有所溺一切斷棄亦有何難但一切斷棄則非道矣知道之士自不溺於此耳初未嘗斷棄之也故曰素富貴行乎富貴素貧賤行乎貧賤素夷狄行乎夷狄素患難行乎患難君子無入而不自得焉所謂自得者得其道也夫子曰富與貴是人之所欲也不以其道得之不處也然則以其道而得焉君子處之矣曷嘗斷棄之哉孟子之答彭更亦曰非其道則一簞食不可受於人如其道則舜受堯之天下不以爲泰子以爲泰乎君子亦惟其道而已矣所謂居天

下之廣居立天下之正位行天下之大道得志與民由之不
得志獨行其道富貴不能淫貧賤不能移威武不能屈非虛
言也學者所造縱未及此苟志於道便當與俗趣燕越矣志
鄉一立即無二事此首重則彼尾輕其勢然也作意立說以
排遣外物者吾知其非真志於道義者矣所欲有甚於生所
惡有甚於死死生大矣而不足以易此况富貴乎富貴之足
慕不足慕豈足多較於學者之前哉前與循中書所以云云
者懼其弱植孤立於橫流之中而此志不能以自拔耳雖然
姬周之衰此道不行孟子之沒此道不明千有五百餘年之
間格言至訓熟爛於浮文外飾功利之習汎濫於天下氣質
之美天常之厚者固知病其末流矣而莫知病其源立言制
行之間抱薪救火揚湯止沸者多矣當今之世誰實爲有志

之士也。求真實學者於斯世，亦誠難哉。非道之難知也，非人之難得也。其勢則然也。有志之士，其肯自恕於此而弗求其志哉？今粗有其志，而實不能以自拔，則所謂講學者，遂爲空言，以滋僞習，豈唯無益其害又大矣？若其善利之間，嘗知決擇大端，已明大志，已立而日用踐履，未能常於清明剛健，一有緩懈，舊習乘之，捷於影響，應答之際，念慮之間，陰流密陷，不自省覺，益積益深，或遇歲藥，勝心持之，反加文飾，因不能以自還者，有矣。甚可畏也。况其大端未嘗實明，大志未嘗實立，有外強中乾之證，而無心廣體胖之樂者，可不深致其思，以省其過，求其實乎？畧此不察，而苟爲大言，以益謬習，偷以自便，嚚以自勝，豈惟不足以欺人，平居靜慮，亦寧能以自欺乎？至是而又自欺其心，則所謂下愚不移者矣。誠能於此深

切著明。則自成。自道。自求。多福者。權在我矣。前言往訓。真先得我心之所同然耳。引翼勉勵。惟日不足。何暇與章句儒。詭譎玩愒。歲月於無用之空言哉。別紙所問。多是古人憫憐後學。詳爲註釋。以曉告之。可謂昭若日星。煥然無少蒙蔽。但當從容紬繹。以滋其涵養。鞭策之實。豈宜復爲蛇畫足。重爲贅疣乎。

先生白鹿洞書院講義云。某雖少服父兄師友之訓。不敢自棄。而頑鈍疎拙。學不加進。每懷愧惕。恐卒負其初心。方將求鍼砭。鐫磨於四方師友。冀獲開發。以免罪戾。此來得從郡侯秘書至白鹿書堂。羣賢畢集。瞻覩盛觀。竊自慶幸。秘書先生教授先生。不察其愚。令登講席。以吐所聞。顧惟庸虛。何敢當此。辭避再三。不得所請。取論語中一章。陳平生之所感。以應。

嘉命亦幸有以教之子曰。君子喻於義。小人喻於利。此章以義利判君子小人。辭旨曉白。然讀之者。苟不切已。觀省亦恐未能有益也。某平日讀此。不無所感。竊謂學者於此。當辨其志。人之所喻。由其所習。所習由其所志。志乎義。則所習者必在於義。所習在義。斯喻於義矣。志乎利。則所習者必在於利。所習在利。斯喻於利矣。故學者之志。不可不辨也。科舉取士久矣。名儒鉅公。皆由此出。今爲士者。固不能免此。然場屋之得失。顧其技與有司好惡如何耳。非所以爲君子小人之辨也。而今世以此相尚。使汨沒於此。而不能自拔。則終日從事者。雖曰聖賢之書。而要其志之所嚮。則有與聖賢背而馳者矣。難而上之。則又惟官資崇卑。祿廩厚薄。是計。豈能悉心力於國事民隱。以無負於任使之者哉。從事其間。更歷之多。講

習之熟安得。不有所喻。顧恐不在於義耳。誠能深思。是身不
可使之爲小人之歸。其於利欲之習。怛然爲之痛心疾首。專
志乎義。而日勉焉。博學審問。謹思明辨。而篤行之。由是而進
於場屋。其文必皆道其平日之學。胸中之蘊。而不詭於聖人
由是而仕。必皆供其職勤。其事心乎國。心乎民。而不爲身計
其得不謂之君子乎。秘書先生起廢以新斯堂。其意篤矣。凡
至斯堂者。必不殊志。願與諸君勉之以毋負其志。

朱子跋其後云。淳熙辛丑春二月。陸兄子靜來自金谿。其
徒朱克家。陸麟之。周清叟。熊鑑。路謙亨。胥訓實。從十日。丁
亥。熹率僚友諸生。與俱至於白鹿書院。請得一言以警學
者。子靜既不鄙而惠許之。至其所以發明敷暢。則又懇到
明白。而皆有以切中學者。隱微深痼之病。蓋聽者莫不竦

孟子學記
然動心焉。熹猶懼其久而或忘之也。復請子靜筆之於簡。受而藏之。凡我同志於此反身而深察之。則庶乎其可不迷於入德之方矣。新安朱熹識。

求放心

聖人之學。心學也。道統肇於唐虞。其授受之際。諄諄於人心道心。孔子作大學。其用功在正心誠意。至孟子言心益詳。既曰仁人心也。又曰心之官則思。思則得之。先立乎其大。則小者不能奪。仁義禮智皆就其發見之心言之。而莫切於求放心之說。明道程子謂聖人千言萬語。止是欲人將已放之心約之。使反復入身來。自能尋向上去。下學而上達。至陸子則專以求放心爲用功之本。屢見於文集語錄。故辨志之後。即以求放心繼焉。凡涵養操存省察。皆所

以求放心也。並附著於篇。

先生作學問求放心。程文云。舉天下從事於其間而莫知其說理無是也。而至於有是。是豈可以不論其故哉。學問也者。是舉天下之所從事於其間者也。然於其所以學問者而觀之。則汗雜茫昧。駁乎無以議爲也。古者學問之道。於是而有莫知其說者矣。仁人心也。心之在人。是人之所以爲人。而與禽獸草木異焉者也。可放而不求哉。古人之求放心。不啻如饑之於食。渴之於飲。焦之待救。溺之待援。固其宜也。學問之道。蓋於是乎在下。愚之人忽視玩聽。不爲動心。而其所謂學問者。乃轉爲浮文。緣飾之具。甚至於假之以快其遂私縱欲之心。扇之以熾其傷善敗類之燄。豈不甚可歎哉。學問之道。無他。求其放心而已矣。孟子斯言。誰能聽之不藐者。

又作求則得之。程文云：良心之在人，雖或有所陷溺，亦未始泯然而盡也。下愚不肖之人，所以自絕於仁人君子之域者，亦特其自棄而不之求耳。誠能反而求之，則是美惡將有所甚明，而好惡趨舍將有不待強而自決者矣。移其愚不肖之所爲，而爲仁人君子之事，殆若決江疏河而赴諸海，夫孰得而禦也？此無他所求者在我，則未有求而不得者也。求則得之，故孟子所以言也。

先生嘗謂李敏求云：大凡爲學，須要有所立。語云：已欲立而立人，卓然不爲流俗所移，乃爲有立。須思量天之所以與我者，是甚底爲復？是要做人，否？理會得這箇明白，然後方可謂之學問。故孟子云：學問之道，無他，求其放心而已矣。如博學審問，謹思明辨，篤行，亦謂此也。此須是有志，方可。孔子曰：吾

十有五而志于學。是這箇志。伯敏云。伯敏於此心能剛制其
非。只是持之不久耳。先生云。只剛制於外。而不內思其本。涵
養之功不至。若得心下明白。正當何須剛制。且如在此說話。
使忽有美色在前。老兄必無悅色之心。若心常似如今。何須
剛制。

先生與趙監汝謙書云。垂諭新功。尤慰勤企。道塞宇宙。非有
所隱。趣在天曰陰陽。在地曰柔剛。在人曰仁義。故仁義者。人
之本心也。孟子曰。存乎人者。豈無仁義之心哉。又曰。我固有
之。非由外鑠我也。愚不肖者。不及焉。則蔽於物欲而失其本。
心。賢者智者。過之。則蔽於意見而失其本心。故易大傳曰。仁
者見之謂之仁。智者見之謂之智。百姓日用而不知。故君子
之道鮮矣。狗物欲者。既馳而不知止。狗意見者。又馳而不知

止。故道在邇而求之遠。事在易而求之難。道豈遠而事豈難。
意見不實。自作艱難耳。深知其非。則蔽解惑去。而得所止矣。
道本自若。豈如以手取物。必有得於外。然後爲得哉。鄧丞於
此。深知端緒。幸與進而圖之。

先生與胡達材第二書云。達材資質甚美。天常亦厚。但前此
講學用心。多馳騖於外。而未知自反。喻如年少子弟。居一故
宅。棟宇宏麗。寢廟堂室。廐庫廩庾。百爾器用。莫不備具。甚安
且廣。而其人乃不自知。不能自作主宰。不能汎掃堂室。修完
墻屋。續先世之業。而不替。而日與飲博者遨遊市肆。雖不能
不時時寢處於故宅。亦不復能享其安且廣者矣。及一旦知
飲博之非。又求長生不死之藥。悅妄人之言。從事於丹砂青
芝。煨爐山屐之間。冀蓬萊瑤池可至。則亦終苦身亡家。伶仃

而後已。惟聲色臭味富貴利達之求而不知爲學者。其說由前有意爲學而不知自返者。其說由後其實皆馳騫於外也。昨相聚時。覺達材精神日漸收拾。不甚馳散。但收拾初時。未甚清明。蒙然未知所向。雖講切之次。感而必應。此乃達材本心。非由外鑠。故如此耳。至於蒙而未發。則是馳騫昏擾之久。大體未能頓清明耳。若不寧耐。復放而他馳。入妄人之說。以求長生不死之術。則恐蓬萊瑤池終不可至。而最爾之身。將斃於煅爐山屐之間矣。蒙見信之篤。輒此以助進修。向時曾說將孟子告子一篇及論語中庸大學中切已分明易曉處。朝夕諷詠。接事時但隨力依本分。不忽不執。見善則遷。有過則改。若江海之浸膏澤之潤。久當煥然冰釋。怡然理順矣。不知曾如此作工夫否。

先生作敬齋記云。古之人。自其身達之家國天下而無愧焉者。不失其本心而已。凡今爲縣者。豈顧其心有不若是乎哉。然或者過於勢而徇於習。則是心殆不可考。吏縱弗肅。則曰。事倚以辦。民困弗蘇。則曰。公取以足。貴勢富彊。雖姦弗治。貧羸孤弱。雖直弗信。習爲故常。天子有勤恤之詔。迎宣拜伏。不爲動心。曰。奚獨我責。吏縱弗肅。民困弗蘇。姦弗治。而直弗信。天子勤恤之意。不宣於民。是豈本心也哉。勢或使之然也。方其流之未遠。平居靜慮。或有感觸。豈能不忸怩於其心。至其同利相挺。同波相激。視已所行爲天下達道。訕侮正言。仇讐正士。則是心或幾乎泯矣。人之所以異於禽獸者。幾希。庶民去之。君子存之。是心或幾乎泯。吾爲懼矣。天地鬼神不可誣也。愚夫愚婦不可欺也。是心或幾乎泯。吾爲懼矣。黃鍾大呂。

施宣於內。能生之物。莫不萌芽。奏以大簇。助以夾鍾。則雖瓦石所壓。重屋所蔽。猶將必達。是心之存。苟得其養。勢豈能遏之哉。貴溪信大縣。縣地過百里。民繁物劇。暨陽吳公爲宰於茲。吏肅矣。而事未始不辦。民蘇矣。而公未始不足。茲治直信。民莫不悅。而惴惴焉。惟恐不能宣天子勤恤之意。是其本心之所發。而不過於其勢者耶。然公之始至。則修學校。延師儒。致禮甚恭。余屢辱其禮。不敢受。今爲齋於其治之東。偏名之以敬。請記於余文。至於再三。望道之重。若不可及者。某聞諸父兄師友。道未有外乎其心者。自可欲之善。至於大而化之之聖。聖而不可知之神。皆吾心也。心之所爲。猶之能生之物。得黃鍾大呂之氣。能養之。至於必達。使瓦石有所不能壓。重屋有所不能蔽。則自有諸已。至於大而化之者。敬其本也。豈

獨爲縣而已。雖然不可以不知其害也。是心之稂莠萌於交。物之初有滋而無芟根固於怠忽末蔓於馳騫深蒙密覆良苗爲之不殖實著者易拔形潛者難察從事於敬者尤不可不致其辯公其謹之某雖不敏他日周旋函丈願有所請公名博古字敏叔淳熙二年十有二月望日迪功郎新隆興府靖安縣主簿陸某記

講明

孔子以學之不講爲憂。孟子論博學歸之於詳說。故陸子謂學有講明。有踐履。而世人妄謂陸子廢言語文字。皆未嘗讀陸子之書者也。雖然陸子所謂講明。悉本於孔氏遺書。不敢改經文。立新義。率天下從事於不可窮之知。以求勝於堯舜所不能徧之物也。大學之言致知格物也。知烏

在。即致其知先後之知。物。烏在。即格其有本末之物。故曰。此謂知本。此謂知之至也。中庸之言明善也。善。烏在。誠身。順親信友。獲上。皆善也。其爲功有序。豫則立。不豫則廢。蓋善之先後。不可以不明也。孟子論家國天下之次。則本於大學。論親長平天下。則本於中庸。至南宋而後亂之。其恪守孔孟講明之法者。陸子一人而已。故述其講明之語於篇。以存古法云。

先生嘗與趙詠道書云。爲學有講明有踐履。大學致知格物。中庸博學審問。謹思明辨。孟子始條理者。智之事。此講明也。大學修身正心。中庸篤行。孟子終條理者。聖之事。此踐履也。物有本末。事有終始。知所先後。則近道矣。欲修其身者。先正其心。欲正其心者。先誠其意。欲誠其意者。先致其知。致知在

格物。自大學言之。固先乎講明矣。自中庸言之。學之弗能問之弗知。思之弗得。辨之弗明。則亦何所行哉。未嘗學問思辨。而曰吾唯篤行之而已。是冥行者也。自孟子言之。則事蓋未有無始而有終者。講明之未至。而徒恃其能力行。是猶射者不習於教法之巧。而徒恃其有力。謂吾能至於百步之外。而不計其未嘗中也。故曰其至爾力也。其中非爾力也。講明有所謂未至。則雖材質之卓異。踐行之純篤。如伊尹之任。伯夷之清。柳下惠之和。不思不勉。從容而然。可以謂之聖矣。而孟子顧有所不願學。拘儒瞽生。又安可以硜硜之必爲而傲知學之士哉。然必一意實學。不事空言。然後可以謂之講明。若謂口耳之學。爲講明。則又非聖人之徒矣。

先生與胡季隨書云。辛丑之春在南康。見所與晦菴書。深服

丙午之夏。吾山廨舍相從越月。以識面爲喜。以歛集爲幸。然區區之懷。終不能孚達於左右。每用自愧。大學言明明德之序。先於致知。孟子言誠身之道。在於明善。今善之未明。知之未至。而循誦習傳。陰儲密積。厯身以從事。喻諸登山而陷谷。愈入而愈深。適越而北轅。愈驚而愈遠。不知開端發足。大指之非。而日與澤虞燕賈。課遠近。計枉直。於其間。是必沒身於大澤。窮老於幽都而已。來書所舉某與元晦論太極書辭。皆至理誠言。左右能撤私去蔽。當無疑於此矣。不然。今之爲欣厭者。皆其私也。豈可遽操以爲驗。稽以爲決哉。先生與劉淳叟第二書云。淳叟平日聞言輒喜。遇事輒詢。有聽納之體。然親朋間未肯歸以取善之實。豈似逆而順情者。喜聽而真實苦口者之未能無齟齬耶。抑從悅者多而改繹。

之未至也。此雖據前日而論。然今亦未能無疑於淳叟也。秋
試禮記義破題誠佳。然或者謂出題乃淳叟意旨。而作義者
適爾投合。苟當於理。豈厭其同。不稽諸理。而苟異以求致益
之名。則固非也。塲屋之弊。固久。然有志者持文衡。將此理是
責。謂彼善於此。則可謂理固如此。則不知言甚矣。申公曰。爲
治不在多言。顧力行如何耳。今曰道不在多言。學貴乎自得。
明理者觀之二語之間。其病昭矣。摩頂放踵。利天下爲之。墨
子非不力行也。其往也使人讓竈讓席。其反也人與之爭竈
爭席。楊子非不自得也。二氏不至多言。而爲異端。顏閔侍側。
夫子無言可也。楊墨交亂。告子許行之徒。又各以其說肆行
於天下。則孟子之辯。豈得已哉。或默或語。各有攸當。以言
餽人以不言。餽人均爲穿窬之類。夫子之於顏子。蓋博之以文。

夫博學於文。豈害自得。顓臾之不必伐。衛政之必正名。冉有季路不能無蔽。夫子不得不申言之。夷之陳相告子之徒。必執其說以害正理。則孟子與之反覆。不得不致其詳。必曰不在多言。問之弗知。弗措。辯之弗明。弗措。皆可削也。自得之說。本於孟子。而當世稱其好辯。自謂博學而詳說之。將以反說約也。中庸固言力行。而在學問思辨之後。今淳叟所取自得。力行之說。與中庸孟子之旨異矣。仁智信直勇剛。皆可以力行。皆可以自得。然好之而不好學。則各有所蔽。倚於一說一行。而玩之。孰無其味。不改諸其正。則人各以其私說而傳於近似之言者。豈有窮已哉。

包顯道錄先生語云。凡所謂不識不知。順帝之則。晏然太平。殊無一事。然却有說。擒搦人不下。不能立事。却要有理會處。

某於顯道。恐不能久處此間。且令涵養大處。如此樣處。未敢發然。某皆是逐事逐物。攷究練磨。日積月累。以至如今。不是自會。亦不是等閑理會。一理會便會。但是理會與他人別。某從來勤理會。長兄每四更一點起時。只見某在看書。或檢書。或默坐。常說與子姪。以爲勤。他人莫及。今人却言某懶。不曾去理會。好笑。

踐履

書言非知之艱。行之維艱。而朱子與劉子澄書。譏陸子之學止是專務踐履。不知踐履而外。別無所謂學也。朱子釋學而章。謂學之爲言。效後覺者。必效先覺之所爲。豈非以踐履爲學乎。陸子嘗謂古之人。言皆實言。行皆實行。言論未形。事實先著。蓋即孔子躬行君子之意。今錄陸子教人

敦踐履之言列講明之後

周伯熊來學先生問學何經對曰讀禮記曾用功於九容乎
曰未也且用功於此後往問學於晦菴晦菴曰僊里近陸先
生曾見之否曰亦嘗請教具述所言晦菴曰公來問某某亦
不過如此說

有一生飯後微交足飯既先生從容問之曰汝適有過知之
乎生畧思曰已省先生曰何過對曰中食覺交足雖即改正
亦放逸也其嚴如此

先生作則以學文程文云欲明夫理者不可以無其本本之
不立而能以明夫理者吾未之見也宇宙之間典常之昭然
倫類之燦然果何適而無其理也學者之爲學固所以明理
然其疇昔之日閨門之內所以慕望期嚮服習踐行者蓋泯

然乎天理之萌蘖而物欲之蔽實豪據乎其中而爲之主則其所以爲學之本者固以磨矣然而方且汲汲於明理吾不知所謂理者果可以如是而明之乎苟惟得之於天者未始泯滅而所以爲學之本者見諸日用而足以怙乎人則雖其統紀條目之未詳自可切磋窮究次第而講明之而是理亦且與吾相契而渙然釋怡然順者將不勝其衆矣

先生與詹子南論爲學之要側重踐履有書云日享事實之樂而無暇辯析於言語之間則後日之明自足以識言語之病急於辯析是學者大病雖若詳明不知其累我多矣石稱丈量徑而寡失銖銖而稱至石必繆寸寸而度至丈必差今吾但能造次必於是顛沛必於是勿忘勿助長則不亦樂乎又何必紛紛爲大小之辨也

先生答曾宅之書云。古人自得之故。有其實。言理則是實理。言事則是實事。德則實德。行則實行。吾與晦翁書。所謂古人質實。不尚智巧。言論未詳。事實先著。知之爲知。不知爲不知。所謂先知覺後知。先覺覺後覺者。以其事實。覺其事實。故言即其事。事即其言。所謂言顧行。行顧言。周道之衰。文貌日勝。事實湮於意見。典訓蕪於辯說。揣量模寫之工。依倣假借之似。其條畫足以自信。其習熟足以自安。以子貢之達。又得夫子而師承之。尚不免此多學而識之見。非夫子叩之。彼固晏然而無疑。先行之訓。予欲無言之訓。所以覺之者。屢矣。而終不悟。夫子既歿。其傳固在曾子。蓋可觀已。况其不工。不似。不足以自信。不足以自安者乎。雖然。彼其工且似。足以自信。足以自安。則有終身不反之患。有不可救藥之勢。乃若未

工未似未足以自信未足以自安者則舍其邪而歸於正猶
易爲力也來書蕩而無歸之說大謬今足下終日依靠人言
語又未有定論如在逆旅乃所謂無所歸今使足下復其本
心居安宅由正路立正位行大道乃反爲無所歸足下之不
智亦甚矣今已私未克之人如在陷穽如在荆棘如在泥塗
如在囹圄械繫之中見先知先覺其言廣大高明與已不類
反疑恐一旦如此則無所歸不亦鄙哉不亦謬哉不知此乃
是廣居正位大道欲得所歸何以易此欲有所主何以易此
今拘攣舊習不肯棄捨乃狃其狹而懼於廣狃其邪而懼於
正狃其小而懼於大尚得謂智乎夫子曰汝爲君子儒無爲
小人儒古之所謂小人儒者亦不過依據末節細行以自律
未至如今人有如許浮論虛說謬悠無根之甚夫子猶以爲

門人之戒。又況如今日。謬悠無根。而可安乎。吾友能棄去。謬習。復其本心。使此一陽爲主。於內造次。必於是。顛沛必於是。無終食之間。而違於是。此乃所謂有事焉。乃所謂勿忘。乃所謂敬。果能不替不息。乃是積善。乃是集義。乃是善養浩然之氣。真能如此。則不愧古人。其引用經語。乃是聖人先得我心之所同然。則不爲侮聖言矣。今終日營營。如無根之木。無源之水。有採摘汲引之勞。而盈涸榮枯。無常。豈所謂源泉混混。不舍晝夜。盈科而後進者哉。終日簸弄經語。以自傳益。真所謂侮聖言者矣。吾與足下言者。必因足下之及此。而後言其旨。只欲足下知古人事實。而不累於無根之說。足下謂得此說。而思之。足下以此爲說。其不明吾言甚矣。宜其不能記憶。附以已意。而失其本真也。

先生與張輔之第三書云。兩書所言踐履之說。皆未曉劣者之意。前書所言踐履。不說聖賢踐履。只說輔之之所踐履。君子有君子踐履。小人有小人踐履。聖賢有聖賢踐履。拘儒瞽生有拘儒瞽生踐履。若果是聖賢踐履。更有甚病。雖未至未純。亦只要一。向踐履去。久則至於聖賢矣。只爲輔之踐履。差了。正如適越北轅。愈驚而愈遠。前書分明與子說是拒善之藩籬。既是拒善之藩籬。又豈可與聖賢踐履同日而語。凡所與子言者。皆只是入頭處。何謂不教以入頭處也。如中庸戒謹恐懼之言。子正不能如是。充子之踐履。識者觀之。正有可愧可耻。不能戒謹不能恐懼。莫甚焉。

先生與詹子南書云。鄉者嘗與吾友溪言爲學之序。見吾友相信之篤。頗知反已就實。深以爲喜。今觀來示。頗又紛紛於

無益之論。人已俱失。要之吾友。且當孜孜行其所知。未當與人辯論。是非辯論。是非以解人之惑。其任甚重。非吾友之責也。不與之論。他日却自明白。今欲遽言之。只是強說。自加惑亂耳。李三一哥所學未久。相信又篤。近在此累次磨治。尚未能去其故習。老夫平日以此事自任。與此等病人說話。尚如此費力。吾友如何解分析得他明白。且先自治。不必與人商議可也。

陸子學譜卷之二

南昌萬承蒼訂

後學臨川李紱編

陸川龐輿校

定宗仰

韓子謂古之學者必有師。陸子教人亦以親師友爲先。宋儒惟周子首開道統。其餘則各有師承。乃詹阜民間陸子之學所受。則告以讀孟子而自得之於心。是直接孟氏之統。而於當世諸儒無所師也。是故論喻義責志。則宗孔子。論先立乎大。求其放心。則宗孟子而已。然於濂溪明道二子無一語不相契合。遠宗孔孟。近仰周程。豈非所謂焉。不學無常師者哉。今錄陸子上承先聖先賢統緒之論爲一

編學者敬瞻庶知嚮往云。

周清叟錄先生語云韓退之言軻之死不得其傳固不敢誣。後世無賢者然直是至伊洛諸公得千載不傳之學但草創未爲光明到今日若不大段光明更幹當甚事。先生與姪孫濬書云道之將墜自孔孟之生不能回天而易命然聖賢豈以其時之如此而廢其業墮其志哉慟哭於顏淵之上喟歎於曾點之志此豈枯於蕞然之形體者所能知哉孔氏之轍環於天下長沮桀溺楚狂接輿負蕢植杖之流刺譏玩慢見於論語者如此耳如當時之俗揆之理勢則其陵藉侵侮豈遽止是哉宋衛陳蔡之間伐木絕糧之事則又幾危其身然其行道之心豈以此等而爲之衰止文不在茲期月而可此夫子之志也春秋之作殆不得已焉耳然而無

有乎爾。則亦無有乎爾。此又孟子之志也。故曰。當今天下舍
我其誰哉。至所以祛尹士充虞之惑者。其自述至詳。且明。由
孟子而來。千有五百餘年之間。以儒名者甚衆。而荀楊王韓
獨著專場。蓋代天下歸之。非止朋遊黨與之私也。若曰。傳堯
舜之道。續孔孟之統。則不容以形似假借。天下萬世之公。亦
終不可厚誣也。至於近時伊洛諸賢。研道益深。講道益詳。志
向之專。踐行之篤。乃漢唐所無。有其所植立。成就可謂盛矣。
然江漢以濯之。秋陽以暴之。未見其如曾子之能信其齔鰾。
肫肫其仁。淵淵其淵。未見其如子思之能達其浩浩。正人心。
息邪說。距詖行。放淫辭。未見其如孟子之長於知言。而有以
承三聖也。故道之不明。天下雖有美材厚德。而不能以自成。
自達。困於聞見之支離。窮年卒歲。而無所至止。若其氣質之

不美志念之不正而假竊傳會蠹食蛆長於經傳文字之間者何可勝道。方今熟爛敗壞如齊威秦王之尸誠有大學之志者敢不少自強乎。於此有志於此有勇於此有立然後能克已復禮遜志時敏真地中有山謙也不然則凡爲謙遜者亦徒爲假竊緣飾而其實崇私務勝而已。比有一輩沉吟堅忍以師心婉孌夸毗以媚世朝三暮四以悅衆狙尤可惡也不爲此等所眩則自求多福何遠之有道非難知亦非難行患人無志耳及其有志又患無真實師友反相眩惑則爲可惜耳。凡今所以爲汝言者爲此耳。蔽解惑去此心此理我固有之所謂萬物皆備於我昔之聖賢先得我心之所同然者耳。故曰周公豈欺我哉。

先生與李省幹書云。古先聖賢無不由學。伏羲尚矣。猶以天

地萬物爲師。俯仰遠近。觀取備矣。於是始作八卦。夫子生於晚周。麟遊鳳翥。出類拔萃。謂天縱之將聖。非溢辭也。然而自謂我非生而知之者。好古敏以求之者也。中庸稱之。亦曰祖述堯舜。憲章文武。堯舜相繼以臨天下。而臯陶矢謨其間。曰朕言惠可底行。武王纘太王王季文王之緒。以有天下。未及下車。訪於箕子。俾陳洪範。高宗曰。台小子舊學於甘盤。既乃遜於荒野。入宅於河。自河徂亳。暨厥終罔顯。爾惟訓于朕志。若作酒醴。爾惟麴蘖。若作和羹。爾惟鹽梅。人生而不知學。學而不求師。其可乎哉。秦漢以來。學絕道喪。世不復有師。以至於唐。曰師曰弟子云者。反以爲笑。韓退之。柳子厚。猶爲屢歎。惟本朝理學遠過漢唐。始復有師道。雖然。學者不求師。與求而不能虛心。不能退聽。此固學者之罪。學者知求師矣。能退

聽矣。所以導之者。乃非其道。此則師之罪也。學於夫子者多矣。顏淵、閔子騫、冉伯牛、仲弓。固無可疵。外此則有南宮适、宓子賤、漆雕開。近於四子。三人之外。最後出如高子羔、曾子。雖有愚魯之號。其實皆夫子所喜。於二人中。尤屬意於子羔。不幸前夫子而死。不見其所成就。卒之傳夫子之道者。乃在曾子。伯魚死。子思乃夫子嫡孫。夫子之門人。光耀於當世者甚多。而子思獨師事曾子。則平日夫子爲子思擇師者。可知矣。宰我、子貢。有若其才智最高。子夏、子游、子張。又下一等。然游夏已擅文學之場。而堂堂乎子張、子游。猶以爲難能。其言論足以動人。光華足以耀俗。誠非以愚魯得號者。可以比擬。至其傳道授業。不繆於聖人。宰我、子貢。有若猶不在此位。况游夏乎。故曰。曾子傳之子思。子思傳之孟子。乃得其傳者外此。

則不可以言道。

闢異學

陸子論學原本於此心之理。嘗謂四海有聖人出焉。此心同。此理同。千古有聖人出焉。亦此心同。此理同。無所謂異也。其有異焉者。或雜於佛老而誤認其心。或溺於章句而自喪其志耳。故曰同此之謂同德。異此之謂異端。夫章句之弊。與佛老之言。誠若有間。然莊子論臧穀亡羊。則挾書冊與博簊者同譏焉。今錄陸子論異學之言爲一卷。繼宗仰之後。庶學者知所向。又當知所戒焉。

先生與陶贊仲第二書云。爲學只要睹。是。不。要。與。人。較。勝。負。今學失其道者。不過習邪說。更相欺誑。以滋養其勝心而已。古人所謂異端者。不專指佛老。異端二字出論語。是孔子之

言孔子之時。中國不聞有佛。雖有老氏。其說未熾。孔子亦不曾闢老氏。異端豈專指老氏哉。天下正理。不容有二。若明此理。天地不能異。此鬼神不能異。此千古聖賢不能異。此若不明此理。私有端緒。即是異端。何止佛老哉。近世言窮理者。亦不到佛老地位。若借佛老爲說。亦是妄說。其言闢佛老者。亦是妄說。今世却有一種天資忠厚。行事謹慤者。雖不談學問。却可謂朋友。惟是談學而無師承。與師承之不正者。最爲害。道與之居處。與之言論。只漸染得謬妄之說。他時難於洗濯。不如且據見在。朴實頭自作工夫。今雖未是。後遇明師友。却易整頓也。理須是窮。但今時即無窮理之人。何時得一來。以究此義。

先生與林叔虎書云。世固有甘心爲小人者。此無可言矣。有

不肯爲小人而甘爲常人者。又未足言也。有不肯爲常人而
墮於流俗中。力不能自拔。又無賢師友提掖之。此可念也。又
有非其不能自拔。其所爲往往不類流俗。堅篤精勤。無須臾
閒暇。又有徒黨傳習。日不暇給。又其書汗牛充棟。而迷惑浸
溺。流痼纏綿。有甚於甘心爲小人。甘心爲常人者。此豈不重
可憐哉。上古聖賢先知此道。以此道覺此民。後世學絕道喪。
邪說蜂起。熟爛以至今日。斯民無所歸命。士人憑私臆決。大
抵可憐矣。而號稱學者。又復如此。道何由而明哉。復晦翁第
二書。多是提此學之綱。非獨爲辯無極之說而已。可更熟復
之。

先生與邵叔誼書云。王澤之竭。利欲日熾。先覺不作。民心橫
奔。浮文異端。轉相熒惑。徃聖話言。徒爲藩籬。而爲機變之巧。

者又復魑魅魍蜴其間。耻非其耻而耻心亡矣。今謂之學問。思辨而於此不能深切著明。依憑空言傳著。意見增疣益贅。助勝崇私。重其狷忿。長其負恃。蒙蔽至理。扞格至言。自以爲是。沒世不復。此其爲罪。浮於自暴自棄之人矣。此人之過。其初甚小。其後乃大人之救之。其初則易。其後則難。亦其勢然也。物有本末。事有終始。知所先後。則近道矣。於其端緒。知之不至。悉精畢力。求多於末。溝瀆皆盈。涸可立待。要之其終。本末俱失。夫子曰。知之爲知之。不知爲不知。是知也。後世耻一物之不知者。亦耻非其耻矣。人情物理之變。何可勝窮。若其標末。雖古聖人不能盡知也。稷之不能審於八音。夔之不能詳於五種。可以理揆。夫子之聖。自以少賤而多能。然稼不如老農。圃不如老圃。雖其老於論道。亦曰學而不厭。啓助之益。

需於後學。伏羲之時。未有堯之文章。唐虞之時。未有成周之禮樂。非伏羲之智不如堯。而堯舜之智不如周公。古之聖賢更續緝熙之際。尚可考也。學未知至。自用其私者。乃至於亂。原委之倫。顛萌蘖之序。窮年卒歲。靡所底麗。猶焦焦然思以易天下。豈不謬哉。

先生與詹子南書云。顏子堅既已去髮胡服。非吾人矣。此人質性本亦虛妄。故卒至於此。育王有一僧曰祖新。姓趙。字日新。其爲僧非本志。質甚穩實。亦有復衣冠之志。曾識之否。得來書。亟作此。託廖丈附便奉達。不能多具。

先生與王順伯論佛書云。去夏遠辱臨存。甚慰積年濶別之懷。執別匆匆。又一歲有半。瞻企不啻饑渴。屢於七七哥書中。蒙寄意之勤。感感。且知別後所學大進。膏潤沾溉多矣。敬仰。

之劇然。愚意竊有願訂正於左右者。不敢避浼瀆之罪。大抵學術有說有實。儒者有儒者之說。老氏有老氏之說。釋氏有釋氏之說。天下之學術衆矣。而大門則此三家也。昔之有是說者。本於有是實。後之求是實者。亦必由是說。故凡學者之欲求其實。則必先習其說。既習之。又有得有不得。有得其實者。有徒得其說而不得其實者。說之中。又有深淺。有精粗。有偏全。有純駁。實之中。亦有之。凡此皆在其一家之中。而自有辯焉者也。論三家之同異得失是非。而相譏於得與不得。說與實。與夫淺深精粗偏全純駁之間。而不知其爲三家之所均有者。則亦非其至者矣。兄前兩與家兄書。大概謂儒釋同。其所以相配比者。蓋所謂均有之者也。某嘗以義利二字判儒釋。又曰公私其實即義利也。儒者以人生天地之間。靈於

萬物貴於萬物與天地並而爲三極。天有天道，地有地道，人
有人道，人而不盡人道，不足與天地並。人有五官，官有五事。
於是。有是非得失。於是有教有學。其教之所從立者如此。故
曰。義曰公釋氏以人生天地間有死生有輪迴有煩惱以爲
甚苦而求所以免之。其有得道明悟者則知本無生死本無
輪迴本無煩惱。故其言曰。生死事大如兄。所謂菩薩發心者
亦只爲此一大事。其教之所從立者如此。故曰。利曰私。惟義
惟公。故經世惟利惟私。故出世儒者雖至於無聲無臭無方
無體。皆主於經世。釋氏雖盡未來際普度之。皆主於出世。今
習釋氏者皆人也。彼既爲人亦安能盡棄吾儒之仁義。彼雖
出家亦上報四恩。日用之間此理之根。諸心而不可泯滅者。
彼固或存之也。然其爲教非爲欲存此而起也。故其存不存。

不足爲溪造其道者輕重。若吾儒則曰。人之所以異於禽獸者。幾希。庶民去之。君子存之。釋氏之所憐憫者。爲未出輪迴。生死相續。謂之生死海裏浮沉。若吾儒中聖賢。豈皆只在他生死海裏浮沉也。彼之所憐憫者。吾聖賢無有也。然其教不爲欲免此而起。故其說不主此也。故釋氏之所憐憫者。吾儒之聖賢無之。吾儒之所病者。釋氏之聖賢則有之。試使釋氏之聖賢而繩以春秋之法。童子知其不免矣。從其教之所由起者。觀之。則儒釋之辨。公私義利之別。判然截然。有不可同者矣。某嘗妄論尊兄之質。人所難及。而不滿人意者。皆所習所鄉。有以病之也。此非今日之言。蓋自初拜識時。已如此。竊議矣。舜居溪山之中。與木石居。與鹿豕遊。其所以異於溪山之野人者。幾希。及其聞一善言。見一善行。若決江河。沛然莫

之能禦也有過而不能勇改。天下之通患。然今世別有一般議論。以不輕改其素守爲老成。爲持重。爲謹審。以幡然改沛然從者爲輕率。爲狂妄。爲無所守。凡事理但論是非。若已知吾所守所行者爲非。則豈可不速改。若謂吾所守所行未爲非。則固不當改。又不論速不速也。知仁勇三者。天下之達德。尊兄之質本有勇。但從來向釋氏不崇儒。故至徇流俗。朋友中見尊兄有剛決過人處。又有徇流俗處。莫不竊怪之。若某則妄論尊兄之徇流俗亦甚勇。他人則容易被聖賢之學聳動。雖不知其實。徃徃以其名而赴之。若尊兄則雖自覺有未穩當處。亦且頑忍安舊。有姑自守且徐圖之意。某念非尊兄無以發其狂言。用忘犯分之罪。猖狂而言。辭不暇擇。某非敢使尊兄竊儒者之名以欺世。願尊兄試以有言逆於汝心。必

求諸道之法。試思之。或有可採。如謂不然。亦願詳以見教。辯白此事。期於到頭。非兄尚誰望。

其第二書云。屬者僭易陳露所見。蒙教復詳至。開發多矣。來書有深不欲多言之語。某竊謂於所不當言者。加一言。則非矣。若在所當言。則惟足以達其理意而已。不可以多少限也。躁人之辭多者。謂其躁妄錯亂贅疣。是則可刪也。今方將於道術趨向之間。切磋求是。則又奚多之病。願尊兄先除此一戒。使其得悉意承教。庶是非可明也。尊兄所學以力行爲主。不專務論說。所見皆行履到處。非但言說而已。此不待論。某固不敢以言說待尊兄。交游間亦不以此病兄。獨謂兄所學不能無蔽耳。楊墨告子許行之徒。豈但言說其所言。即其所行而孟子力闢之者。以爲其學非也。儒釋之辯。某平時亦少

所與論者有相信者。或以語之。亦無所辯難於我。無益有自
立議論與我異者。又多是勝心所持。必欲已說之伸。不能公
平求是。與之反覆。只成爭辯。此又不可與論。今之僧徒多擔
夫庸人。不通文理。既去髮胡服。又安能使之髮兒潔縉而從
吾遊耶。至於士大夫之好佛者。雖其好佛。亦只爲名而已。此
又不足與論也。至如尊兄不爲名。不好勝。凡事皆公心求是。
又聰明博洽。鄉來未有自得處。猶有凝滯退縮之態。比來所
見明白。議論發越。殊無疑滯退縮之態矣。設有如是資質。如
是所到。然但工一家之說。則又難論。今兄兩家之書已皆探
討。此而不與極論。則只是成自檐版矣。鄉來切疑於兄者。以
爲兄之資稟實強敏有餘。而宏大通達則不足。懼爲平日所
鄉所學所習之所攝持。密制其命。而不能度越擺脫。操不忌

本之說以爲典訓。拒排釋氏者於千里之外。而與至則行矣。趨而避之者。同其介然自守之意。則無間之可乘矣。承來教。謂若使釋果未進於儒。理須進步。何苦守其卑污而不進。然後知高明之度。本自宏濶。而某之疑。則誠淺陋矣。某前書所論。論其教之所從起。而兄則指其所造以辯之。某雖不曾看釋藏經教。然如楞嚴圓覺維摩等經。則嘗見之。如來書所舉愛涅槃憎生死。正是未免生死。未出輪迴。不了四相者。正是未免生死。未出輪迴。四相雖有淺深精粗。然其壽者相。亦只是我相根本。潛伏藏識。謂之命根不斷。故其文曰。若有人讚歎彼法。則生歡喜。便欲濟度。若有人誹謗彼所得者。即生嗔恨。此亦正是未免生死。未出輪迴。又如來教因地法行。亦無身心受彼生死。正是免得生死。出得輪迴。伊川先生有云。釋

氏只是理會生死。其他都不理會。近有一前輩叅禪。禪叢中稱其所得。一日舉伊川先生之言曰。某當時若得侍坐。便問道。不知除生死外更有甚事。不知尊兄所見。與此人優劣如何。若尊兄初心不爲生死。不知因何趨向其道。來書實際理地。雖不受一塵。而佛事門中。不捨一法。若論不捨一法。則虎穴魔宮。皆爲佛事。淫房酒肆。盡是道場。維摩使須菩提置鉢欲去之地。乃其極則。當是時。十地菩薩猶被呵斥。以爲取舍未忘。染淨心在。彼其視吾詩禮春秋。何啻以爲緒餘土苴。惟其教之所從起者如此。故其道之所極亦如此。故某嘗謂儒爲大中釋爲大偏。以釋與其他百家論。則百家爲不及。釋爲過之。原其始要其終。則私與利而已。來教謂佛說出世。非舍此世而於天地外別有樂處。某本非謂其如此。獨謂其不主

於經世。非三極之道耳。又謂若衆聖所以經世者。不由自心。建立方可言。經世異於出世。而別有妙道也。吾儒之道。乃天下之常道。豈是別有妙道。謂之典常。謂之彝倫。蓋天下之所共由。斯民之所日用。此道一而已矣。不可改頭換面。前書固謂今之爲釋氏者。亦豈能盡捨吾道。特其不主於是。而其違順得失。不足以爲深造其道者之輕重耳。尊兄謂行所當行。尊兄日用中所行合理處。自是天資之美。與探討儒書之力。豈是讀華嚴有省發。後方始如此。然尊兄豈能保其所行皆合於理乎。韋編三絕。而後贊易。敢道尊兄未嘗從事如此工。夫吾志在春秋。敢道尊兄不能有此志。我亦欲正人心息邪說。詎詖行。放淫辭。敢道此非尊兄之所欲。如是而謂儒釋同。恐無是理。今尊兄將空諸所有。其視硜硜擊磬者。果爲何事。

哉。若治大國若烹小鮮。不以智治國。國之福。或者其可以與
尊兄之道並行而不悖也。某方吐胸中愚見。欲求訂正。其辭
不得不自達。願尊兄平心觀之。如不以爲然。幸無愛辭。鄉時
兄弟有所論難。尚蒙推挽。令各極其意。况在朋友。彼此無他
疑。正宜悉意評論。期歸乎一是之地。某平昔愚見。所到持論
甚堅。然人言有以服其心。則不憚於幡然而改。惟尊兄有以
知我。非執己好勝者。幸不憚盡言。若鄙言可採。亦願尊兄不
憚改轍也。周公思兼三王以施四事。其有不合者。仰而思之。
夜以繼日。幸而得之。坐以待旦。夫子自謂其爲人也。發憤忘
食。樂以忘憂。不知老之將至云爾。又曰。吾嘗終日不食。終夜
不寢。以思無益。不如學也。又曰。我學不厭。而教不倦。此豈不
可爲吾人標的乎。但只如此隨見在去。豈便無益於天下。願

有如尊兄之質。不無可惜處。適得張南軒與家兄書。今附達家兄處。可試觀之。如何。家兄逼歲必歸宅上。不知曾更有切磋否。歲即除。伏幾多爲親壽。以厚新社。

先生贈劉季蒙云。明德在我。何必他求。方士禪伯。真爲大祟。無世俗之陷溺。無二崇之迷惑。所謂無偏無黨。王道蕩蕩。浩然宇宙之間。其樂孰可量也。壬子月日。蒙泉守陸某書。贈劉季蒙。

先生作好學。近乎知。程文云。聖人之言。有若不待辯而明。自後世言之。則有不可不辯者。夫所謂智者。是其識之甚明。而無所不知者也。夫其識之甚明。而無所不知者。不可以多得也。然識之不明。豈無可以致明之道乎。有所不知。豈無可以致知之道乎。學也者。是所以致明致知之道也。向也不明。吾

從而學之。學之不已。豈有不明者哉。向也。不知。吾從而學之。學之不已。豈有不知者哉。學果可以致明。而致知。則好學者。可不謂之近知乎。是所謂不待辯而明者也。然大道之不明。斯人之陷溺。古之所謂學者。後世莫之或知矣。今自童子受一卷之書。亦可謂之學。雖學農圃技巧之業。亦不可不謂之學。人各隨其所欲能者而學之。俗各隨其所漸誘者而學之。均之爲學也。雖其學之也。有好。有不好。其好之也。有篤。有不篤。而當其篤好之也。均之爲好學也。今學農圃技巧之業者。姑不論。而如童子受書。如射御書數。專爲一藝者。亦姑不論。又如詭怪妖妄之人。學爲欺世誣人之事者。亦姑不論。而世蓋有人焉。氣庸質腐。溺於鄙陋之俗。習於庸猥之說。膠於卑淺零亂之見。而乃勉勉而學。孜孜而問。茫茫而思。汲汲而行。

聞見愈雜。智識愈迷。東轅則恐背於西南。轅則恐違於北。執一則懼爲通者所笑。泛從則懼爲專者所非。進退無守。彷徨失據。是其好之愈篤。而自病愈深。若是而學若是而好者。果可謂之近於智乎。此所謂自後世言之。則有不可不辯焉者也。

劉定夫舉禪說。正人說邪說。邪說亦是正。邪人說正說。正說亦是邪。先生曰。此邪說也。正則皆正。邪則皆邪。正人豈有邪說。邪人豈有正說。此儒釋之分也。

先生語繆文子云。近日學者無師法。徃徃被邪說所惑。異端能惑人。自吾儒敗績。故能入。使在唐虞之時。道在天下。愚夫愚婦亦皆有渾厚氣象。是時便使活佛活老子莊列出來也。開口不得。惟陋儒不能行道。如人家子孫敗壞父祖家風。故

釋老却倒來檢點你。如莊子云。以智治國。國之賊。惟是陋儒。不能行。所無事故。被他如此說。若智者行其所無事。如何是國之賊。今之攻異端者。但以其名攻之。初不知自家自被他檢點。在他下面。如何得他服。你須是先理會了我底。是得有以使之服方可。

先生云。今世儒者。類指佛老爲異端。孔子曰。攻乎異端。孔子時。佛教未入中國。雖有老子。其說未著。却指那個爲異端。蓋異字與同字爲對。雖同師堯舜。而所學異緒。與堯舜不同。此所以爲異端也。先生因做學者攻異端。曰。天下之理。將從其簡且易者而學之乎。將欲其繁且難者而學之乎。若繁且難者。果足以爲道。勞苦而爲之可也。其實本不足以爲道。學者何苦於繁難之說。簡且易者。又易知易從。又信足以爲道。學

孟子學言 卷二
者何憚而不爲簡易之從乎。

告子與孟子並駕其說於天下。孟子將破其說。不得不就他所見處。細與他研磨。一次將杞柳來論。便就其杞柳上破其說。一次將湍水來論。便就他湍水上破其說。一次將生之謂性來論。又就他生之謂性上破其說。一次將仁內義外來論。又就他義外上破其說。窮究異端。要得恁地。使他無言語始得。

又云。夫子沒。老氏之說出。至漢而其術益行。曹參相齊。盡召長老諸先生。問所以安集百姓。而齊故儒以百數。言人。人殊。參未知所定。聞膠西蓋公善治黃老言。使人厚幣請之。既見蓋公。公爲言治道貴清淨。而民自定。推此類而具言之。參於是避正堂舍蓋公焉。其治要用黃老術。故相齊九年。齊國安。

集大稱賢相。此見老氏之脉在此也。蕭何薨。參入相。壹遵何之約束。擇郡縣吏長。木訥於文辭。謹厚長者。即召除爲丞相。史吏言文刻深。欲聲名。輒斥去之。日夜飲酒。不事事。見人有細過。掩匿覆蓋之。府中無事。漢家之治。血脉在此。又云。孟子沒。吾道不得其傳。而老氏之學。始於周末。盛於漢。迨晉而衰矣。老氏衰。而佛氏之學出焉。佛氏始於梁達磨。盛於唐。至今而衰矣。有大賢者出。吾道其興矣夫。又云。釋氏謂此一物。非他物故也。然與吾儒不同。吾儒無不該備。無不管攝。釋氏了此一身。皆無餘事。公私義利於此而分。又云。釋氏立教。本欲脫離生死。惟主於成其私耳。此其病根也。且如世界如此。忽然生一個謂之禪。已自是無風起浪平。

地起土堆了。

陸子學譜卷之三

南昌萬承蒼訂

後學臨川李紱編

平越王士俊校

讀書

世言先生不教人讀書者。妄也。先生深於經。熟於史。沉浸於唐及北宋大家之文。讀其雜著講義程文。經史貫穿。讀其書序論記銘誄諸篇。精於文律者。未能或之先也。非讀書。何以致是。朱子謂子靜若不讀書。安能作衆人之師。先生亦自謂某何嘗不教人讀書。但比他人讀來差別耳。昔大程子責謝上蔡讀史爲玩物喪志。及自己讀史。又逐行看過。一字不差。先生之意。正猶是也。今錄其教人讀書之

法爲學者退息之居學焉。

先生作學古入官議事以制政乃不迷程文云天下有不易之理是理有不窮之變誠得其理則變之不窮者皆理之不易者也理之所在固不外乎人也而人之生亦豈能遽明此理而盡之哉開闢以來聖神代作君臣之相與倡和彌縫前後之相與緝理賡續其規恢締建之廣大深密咨詢計慮之委曲詳備證驗之著有足以析疑更嘗之多有足以破陋被之載籍著爲典訓則古制之所以存於後世者豈徒爲故實文具而已哉以不易之理禦不窮之變於是乎在矣學之以入官操之以議事政之不迷固其所也。

先生答邵中孚書云大抵讀書訓詁既通之後但平心讀之不必強加揣量則無非浸灌培益鞭策磨勵之功即有未通

曉處姑缺之無害。且以其明白昭晰者。日加涵泳。則自然日
克。日明。後日本原深厚。則向來未曉者。將亦有煥然冰釋者
矣。告子一篇。自牛山之木。嘗美矣。以下可常讀之。其浸灌培
植之益。當日深日固也。其卷首與告子論性處。却不必深考。
恐其力量未到。則反惑亂精神。後日不患不通解也。此最是
讀書良法。其他非相見莫能盡。尚書臯陶益稷大禹謨太甲
說命旅獒洪範無逸等篇。可常讀之。其餘少緩。何時得相見。
諸當面盡。未間千萬勉旃。以卒賢業。

先生與朱濟道書云。某嘗令後生讀書時。且精讀文義。分明
事節。易曉者。優游諷詠。使之浹洽。與日用相協。非但空言虛
說。則向來疑惑處。自當煥然冰釋矣。縱有未解。固當候之不
可強探。力索。久當自通。所通必真實。與私識揣度者。天淵不

足喻其遠也。不在多言。勉旃是望。

先生有策問論讀書云。古者八歲入小學。十五入大學。小學教之射御書數。大學之道。則歸乎明明德於天下者。今教童稚。不過使之習字畫讀書。稍長。則教之屬文。讀書。則自孝經論語。以及六經子史。屬文。則自詩對。至於所謂經義詞賦論策者。不識能有古者。小學大學之遺意乎。若曰。今之教人者。不必如古。惟使之能爲文。應有司程度。可以取科第而已。則竊有疑焉。幼所誦書。長必知其意義。及其作文。則所謂題目者。又皆出於古書。則必能言其義。而後文可成也。如孝經首章。所謂立身行道。論語首章言學而時習之。孟子首章言何必曰利。亦有仁義而已。不知果何如而立身。何如而行道。所學所習。果何道何業。利與仁義何如而辨。若此等類。今之爲

文者果有不必知之者乎。若曰：今之教人者，與古大異。言之於口，筆之於紙，施之於場屋者，不必有其實。巧與勤者，斯可矣。然亦不廢仁義忠信之道。兩者並行，不相悖。不識有是理乎？夫仁義忠信之道，古人汲汲學之，猶懼有間。今悉力從事者，初不在是。而曰：自能不廢，則是今人才質過古人遠矣。不然，則是父詔其子，兄語其弟，朋友之羣居相與從事者，皆爲欺爲僞，相驅入於罟獲陷穽也。而可安乎？諸君幸詳考備究，而精言之，當得其實而後可。

先生嘗謂李伯敏云：某舊日伊洛文字，不曾看。近日方看見。其間多有不是。今人讀書，平易處不理會，有可以起人羨慕者，則着力研究。古先聖人何嘗有起人羨慕者？只是此道不行，見有奇特處，便生羨慕。自周末文弊，便有此風。如唐虞之

時。人。人。如。此。又。何。羨。慕。所。以。莊。周。云。臧。與。穀。共。牧。羊。而。俱。亡。其。羊。問。臧。奚。事。曰。博。塞。以。遊。問。穀。奚。事。曰。挾。策。讀。書。其。爲。亡。羊。一。也。某。讀。書。只。看。古。註。聖。人。之。言。自。明。白。且。如。弟。子。入。則。孝。出。則。弟。是。分。明。說。與。你。入。便。孝。出。便。弟。何。須。得。傳。註。學。者。疲。精。神。於。此。是。以。擔。子。越。重。到。某。這。裏。只。是。與。他。減。擔。只。此。便。是。格。物。伯。敏。云。每。讀。書。始。者。心。甚。專。三。五。遍。後。往。往。心。不。在。此。知。其。如。此。必。欲。使。心。在。書。上。則。又。別。生。一。心。卒。之。方。寸。擾。擾。先。生。云。此。是。聽。某。言。不。入。若。聽。得。入。自。無。此。患。某。之。言。打。做。一。處。吾。友。二。三。其。心。了。如。今。讀。書。且。平。平。讀。未。曉。處。且。放。過。不。必。太。滯。

伯。敏。問。作。文。法。先。生。云。讀。漢。史。韓。柳。歐。蘇。尹。師。魯。李。淇。水。文。不。誤。後。生。惟。讀。書。一。路。所。謂。讀。書。須。當。明。物。理。揣。事。情。論。事。

勢。且。如。讀。史。須。看。他。所。以。成。所。以。敗。所。以。是。所。以。非。處。優。游。涵。泳。久。自。得。力。若。如。此。讀。得。三。五。卷。勝。看。三。萬。卷。

詹。阜。民。錄。先。生。語。云。孔。門。弟。子。如。子。夏。子。游。宰。我。子。貢。雖。不。遇。聖。人。亦。足。號。名。學。者。爲。萬。世。師。然。卒。得。聖。人。之。傳。者。柴。之。愚。參。之。魯。蓋。病。後。世。學。者。溺。於。文。義。知。見。繳。繞。蔽。惑。愈。甚。不。可。入。道。耳。阜。民。既。還。邸。遂。盡。屏。諸。書。及。後。來。疑。其。不。可。又。問。先。生。曰。某。何。嘗。不。教。人。讀。書。不。知。此。後。然。有。事。在。先。生。又。曰。讀。書。不。必。窮。索。平。易。讀。之。識。其。可。識。者。久。將。自。明。毋。耻。不。知。子。亦。見。今。之。讀。書。談。經。者。乎。歷。敘。數。十。家。之。旨。而。以。已。見。終。之。開。闢。反。復。自。謂。究。竟。精。微。然。試。探。其。實。固。未。之。得。也。則。何。益。哉。

周。廉。夫。錄。先。生。語。云。後。生。看。經。書。須。着。看。注。疏。及。先。儒。解。釋。

不然。執已見議論。恐入自是之域。便輕視古人。至漢唐間。名臣議論。反之吾心。有甚悖道。亦須自家有證。諸庶民而不謬。底道理。然後別白言之。又云。讀書之法。須是平平淡淡去看。子細玩味。不可草草。所謂優而柔之。厭而飫之。自然有渙然冰釋。怡然理順。底道理。

爲政

幼而學之。壯而欲行之。儒術非迂疎而寡效也。陸子之學。未及大行於天下。其致君之忠。止見於輪對五劄。其察吏安民之道。止見於與蘇宰趙守諸書。其出身而加民者。則荆門之政。過化存神。期月間。政修事治。吏畏民懷。訟獄衰息。周益公所謂躬行之效者也。假使南宋能竟其用。則孔子之爲東周。孟子之安天下。夫豈遠哉。今錄其議論設施。

關於政治者爲學者示之則焉。

先生爲勅局刪定官輪對劄子其一云臣讀典謨大訓見君臣之都俞吁咈相與論辯各極其意了無忌諱嫌疑於是知事君之義當無所不用其情唐太宗即位之初魏證爲尚書右丞或毀證以阿黨親戚者太宗使溫彥博按訊非是彥博言證爲人臣不能著形迹遠嫌疑心雖無私亦有可責太宗使彥博責證且曰自今宜存形迹證入見曰臣聞君臣同德是謂一體宜相與盡誠若上下但存形迹則邦之興衰未可知也太宗瞿然曰吾已悔之數年之後蠻夷君長帶刀宿衛外戶不閉商旅野宿非偶然也唐太宗固未足爲陛下道然其君臣之間一能如此即著成效陛下天錫智勇隆寬盡下遠追堯舜誠不爲難而臨御二十餘年未有太宗數年之效

版圖未歸。讐耻未復。生聚教訓之實。可爲寒心。執事者方雍。雍于于以文書期會之隙。與造請乞憐之人。俯仰酬酢而不倦。道兩暘時。若有詠頌太平之意。臣竊惑之。臣誠恐因循玩習之久。薰蒸浸漬之深。雖陛下之剛健。亦不能不消蝕也。鸞鳳之所以能高飛者。在六翮。臣願陛下毋以今日所進爲如是足矣。而博求天下之俊傑。相與舉論道經邦之職。將見無愧於唐虞之朝。而唐之太宗誠不足爲陛下道也。取進止。其第二劄子云。臣讀漢武帝策賢良詔。至所謂任大而守重。嘗竊歎曰。漢武亦安知所謂任大而守重者。自秦漢而降。言治者稱漢唐。漢唐之治。雖其賢君亦不過因陋就簡。無卓然志於道者。因陋就簡。何大何重之有。今陛下獨卓然有志於道。真所謂任大而守重。道在天下。固不可磨滅。然人能弘道。

非道弘人。今陛下羽翼未成。則臣恐陛下此心亦不能以自遂。陛下此志不遂。則宜其治功之不立。日月愈邁而駸駸然反出。漢唐賢君之下也。神龍棄滄海。釋風雲而與鯢鯢校技於尺澤。理必不如臣願。陛下益致尊德樂道之誠。以遂初志。則豈惟今天下之幸。千古有光矣。取進止。

其第三劄子云。臣嘗謂事之至難。莫如知人事之至大。亦莫如知人。人主誠能知人。則天下無餘事。管仲嘗三戰三北。三見逐於君。鮑叔何所見。而遽使小白置彎弓之怨。釋囚拘而相之。韓信家貧無行。不得推擇爲吏。不能自業。見厭於人。寄食於漂母。受辱於胯下。蕭相國何所見。而必使漢王拔於亡卒之中。齋戒設臺而拜之。陸遜吳中年少書生耳。呂蒙何所見。而必使孫仲謀越諸老将而用之。諸葛孔明南陽耕夫。偃

蹇爲大者耳。徐庶何所見。而必欲屈先主枉駕顧之。此四人者。自其已成之效觀之。童子知其爲非常士也。當其窮困未遇之時。臣謂常人之識。必無能知之理。人之知識。若登梯然。進一級。則所見愈廣。上者兼下之所見。下者必不能如上之所見。陛下誠能坐進此道。使古今人品瞭然於心目。則四子之事。又豈足爲陛下道哉。若猶屈鳳翼於雞鶩之羣。日與瑣瑣者共事。信其俗耳庸目。以是非古今臧否人物。則非臣之所敢知也。取進止。

其第四劄子云。臣嘗謂天下之事。有可立致者。有當馴致者。旨趣之差。議論之失。是惟不悟。悟則可以立改。故定趨向。立規模。不待悠久。此則所謂立致者。如救宿弊之風俗。正久隳之法度。雖大舜周公復生。亦不能一旦盡如其意。惟其趨向。

既。定。規。模。既。立。徐。圖。漸。治。磨。以。歲。月。乃。可。望。其。不。變。此。則。所。謂。當。馴。致。者。日。至。之。時。陽。氣。即。應。此。立。致。之。驗。也。大。冬。不。能。一。日。而。爲。大。夏。此。馴。致。之。驗。也。凡。事。不。合。天。理。不。當。人。心。者。必。害。天。下。效。見。之。著。無。愚。智。皆。知。其。非。然。或。智。不。燭。理。量。不。容。物。一。旦。不。勝。其。忿。驟。爲。變。更。其。禍。敗。往。往。甚。於。前。日。後。人。懲。之。乃。謂。無。可。變。更。之。理。真。所。謂。懲。羹。吹。虀。因。噎。廢。食。者。也。自。秦。漢。以。來。治。道。龐。雜。而。甘。心。懷。愧。於。前。古。者。病。正。坐。此。歲。在。壬。辰。臣。省。試。對。策。首。篇。大。抵。言。古。事。是。非。初。不。難。論。但。論。於。今。日。多。類。空。言。事。體。遼。絕。形。勢。隔。塞。無。可。施。行。末。章。有。云。然。則。三。代。之。政。豈。終。不。可。復。哉。合。抱。之。木。萌。蘖。之。生。長。也。大。夏。之。暑。大。冬。之。推。移。也。三。代。之。政。豈。終。不。可。復。哉。顧。當。爲。之。以。漸。而。不。可。驟。耳。有。包。荒。之。量。有。馮。河。之。勇。有。不。遐。遺。之。明。

有。朋。心。之。公。於。復。三。代。乎。何。有。臣。乃。今。日。請。復。爲。陛。下。誦。之。
取。進。止。

其。第。五。劄。子。云。臣。聞。人。主。不。親。細。故。故。臯。陶。賡。歌。致。叢。脞。之。
戒。周。公。作。立。政。稱。文。王。罔。攸。兼。於。庶。言。庶。獄。庶。事。唐。德。宗。親。
擇。吏。宰。畿。邑。柳。渾。曰。陛。下。當。擇。臣。輩。以。輔。聖。德。臣。當。選。京。兆。
尹。以。成。大。化。尹。當。求。令。長。以。親。細。故。代。尹。擇。令。非。陛。下。所。宜。
此。言。誠。得。臯。陶。周。公。之。旨。今。天。下。米。鹽。靡。密。之。務。徃。徃。皆。上。
累。宸。聽。臣。謂。陛。下。雖。得。臯。陶。周。公。亦。何。暇。與。之。論。道。經。邦。哉。
荀。卿。子。曰。主。好。要。則。百。事。詳。主。好。詳。則。百。事。荒。臣。觀。今。日。之。
事。有。宜。責。之。令。者。令。則。曰。我。不。得。自。行。其。事。有。宜。責。之。守。者。
守。亦。曰。我。不。得。自。行。其。事。推。而。上。之。莫。不。皆。然。文。移。回。復。互。
相。牽。制。其。說。曰。所。以。防。私。而。行。私。者。方。藉。是。以。藏。姦。伏。慝。使。

人。不。可。致。詰。惟。盡。忠。竭。力。之。人。欲。舉。其。職。則。苦。於。隔。絕。而。不。得。以。遂。志。以。陛。下。之。英。明。焦。勞。於。上。而。事。實。之。在。天。下。者。皆。不。能。如。陛。下。之。志。則。豈。非。好。詳。之。過。耶。此。臣。所。謂。旨。趣。之。差。議。論。之。失。而。可。以。立。變。者。也。臣。謂。必。深。懲。此。失。然。後。能。遂。求。道。之。志。致。知。人。之。明。陛。下。雖。垂。拱。無。爲。而。百。事。詳。矣。臣。不。勝。拳。拳。取。進。止。

右先生五劄首論君臣當捐形迹以開入告之路。次言人主當志於道。任大守重。不可因陋就簡。以啓其大有爲之志。三言人主當知人擇賢。不可信庸耳俗目。以爲聽言之本。四言爲治當以漸而不可驟。庶可馴至於三代之盛。五言人主不當親細故。深懲好詳之過。乃能遂求道之志。皆啓心沃心之大端也。人主必具此五者。然後可以論治。先

生初獲輪對。故先其大者。必大者見信。然後賓師食貨禮樂政刑之利弊。可次第敷陳。惜乎止此一對。至次對將及。而忌者遽以監丞遷之。且王信之駁。即予祠祿。併不使容於朝廷之間。則天之無意於宋也。或疑先生五劄辭意簡淡。不如他人極言利弊。剴切詳明者。不知此五者若未能行。雖日陳萬言。何益之有。孟子謂人不足與適。政不足與間。惟大人爲能格君心之非。先生之學本於孟子。故入告之辭。得其體要如此。當時大小臣工。下逮諸生。皆得言事。每日通進司所上。不知章奏若干。動輒連篇累牘。或千言。或數千言。人主一日萬幾。覽之不能終卷矣。且入耳不煩。施於貴臣。猶爾。而至尊之前。辭煩不殺。豈知奏對之體者乎。附書所以庶於先生用意所在。發明百一以解世俗之

惑焉。若范文正公、王文公、蘇文忠公，各有萬言之奏，則皆盡獻生平所學。上書之體，與尋常奏對不同。然亦不無煩冗之弊。孔孟家法，必不爾也。至於外任治法，附錄先生與守令書及荆門政蹟於左。

先生與宋漕使若水書云：金谿爲邑，封壤褊隘，無豪商富民生產之絕出等夷者。稅籍之爲緡錢，不過以十計。聞之故老，往時人烟稀少，民皆自食其力，畏事自愛。輸公先期，無催期之擾。家用饒給，風俗醇美。歲時伏臘，雞豚相遺，杯酒相歡。熙熙如也。自建炎紹興以來，寢不如舊。民日益貧，俗日益弊。比年荒歉，益致窮蹙。原其所自，官實病之。大軍月椿，起於紹興初，用兵權以紓急，兵罷不除，因以爲額。立額未幾，有漕使勾君者，知其爲橫斂，初無名色，行縣之次，問邑吏月椿之所從。

取凡以實告者。皆得蠲減。獨金谿少吏不解事。懼吐實則有罪。輒以有名色對。故金谿獨不蒙蠲減。月解之數。爲緡錢八百有奇。以歲計之。當輸萬緡。胥民之端。莫大於此。貪吏並緣。侵欲無藝。椎骨歷髓。民不聊生。縱遇循吏。莫能善後。累有善宰。條陳本末。祈請蠲除。上府不察。吏胥持之。竟不施行。今縣宰仁厚。愛民甚篤。佐貳皆賢。適值連歲旱傷。今歲大旱。留意賑恤。盡却吏胥侵漁之策。細民始有生全之望。而月解積負。無所取償。復此詢究。月椿本末。以致祈懇。此在縣官。特九牛一毛耳。而可使一邑數萬家。免於窮困流離。長無歎息。誠仁人所樂爲也。況如執事之賢。當不待贊。第以某嘗托契門牆。而占籍茲邑。當其休戚。不敢不告。某復有管見。欲效涓埃。比年民力日竭。國計日匱。郡縣日窘。獨吏胥屬饜耳。郡縣積負。

日加歲增。版漕監司督之。州郡州郡督之。縣縣督之。民吏胥
睢盱其間。轉相並緣。以濟其私。吏欲日飽。而積負自若。文移
之煩。追逮之頻。賄謝之厚。歛取之苛。皆此其故也。故督積負
無補於縣官。獨足爲吏胥賄謝之地。以重困吾民耳。所謂督
於民者。民豈真有負哉。官更新故相仍。有若郵置。緣絕簿書。
以蓋侵盜。積負之源。實在於此。督至於縣。而無所從取。則橫
取諸民耳。今常賦之外。奇名異例。以取於民。如所謂月椿者。
不可悉數。郡縣月輸歲供。具之版帳。盡責版帳之輸。猶懼不
給。彼又安能輸積負哉。鄙語所謂移東籬掩西障。或有以積
負輸者。上之人不察。欣然以喜。不知其非公家之利。乃吏胥
之便也。舊者輸而新者積矣。善爲上者。莫若舍積負而責新
輸。則賄謝絕。郡縣寬民。可以息肩。百姓足。君孰與不足。殆不

可謂書生常談而忽之也。不識高明以爲何如。是間倉臺守倅皆賢。有所見請有所施行。皆可共事。不致有齟齬也。聞便稍亟。書字有塗注處。併幸亮恕。

先生與趙節推書云。黃霸爲潁州守。鰥寡孤獨無以葬者。霸爲區處曰。某有大木。可以爲棺。某亭猪子。可以祭。吏往皆如其言。遣吏司察事。既還而勞其食於道旁。爲鳥所攫肉。事每得實。人無敢欺。皆以爲神。史家載其得之之由。以爲語次。尋繹問他陰伏。以相叅攷。後世儒者以爲鈎距而鄙之。此在黃霸雖未盡善。而後儒非之者。尤爲無知。蓋不論其本而論其末。不觀其心而遽議其行事。則皆不足以論人。原霸之心。本欲免人之欺。求事之實。則亦豈可多罪。今風俗弊甚。獄訟煩多。吏奸爲朋。民無所歸命。曲直不分。以賄爲勝負。獄訟之間。

雖有善士臨之。亦未能盡得其情。若有志之士。欲究其實。豈免用問馬。參牛之智。愚儒必以鈎距非之。則是必使情實。不知曲直。倒置奸惡。肆行不辜。無告然後爲道耶。故愚儒之論。害道傷治。真實學者。必當辯明乎此。則正理可得而信也。近見王吉州言。監司太守不可輕置人於獄。蓋獄官多非其人。吏卒常司其權。平民一抵於獄。唯獄卒之所爲。箠楚之下。何求不得。文案既上。從而察之。不能復有所見矣。蓋其情詞皆由於吏卒之所成練。前書所謂奏當之成。雖使臯陶聽之。猶以爲死有餘辜者。謂此也。今有兩詞各護其說。左證疑似簿書契要。無可攷據。事又有不在簿書契要者。則獄中求實之法。謂之閃隔。假令有二人。則隔爲二處。三人則隔爲三處。不使之相聞。知以吾所疑。與其事之節目。逐處審問。謹思精察。

要領可以得情者。反覆求之。若使得在於初詞之外。若可遽信。則必於兩處參審。必使有若合符節者。乃可據耳。然此事最難。若官人盡心。却不能防吏卒之奸。則吏卒必陰漏其事。官人之智。無所施矣。故獄訟惟得情爲難。唐虞之朝。惟臯陶見道甚明。羣聖所宗。舜乃使之爲士。周書亦曰。司寇蘇公式敬。爾由獄。賁象亦曰。君子以明庶政。無敢折獄。賁乃山下有火。火爲至明。然猶言無敢折獄。此事正是學者用功處。噬嗑離在上。則曰利用獄。豐離在下。則曰折獄致刑。蓋貴其明也。新司理初間甚賢。繼而聞之。亦無能爲重輕。足下尤宜謹之。又云。官人者異鄉之人。吏人者本鄉之人。官人年滿者三考。成資者兩考。吏人則長子孫於其間。官人視事。則左右前後皆吏人也。故官人爲吏所欺。爲吏所賣。亦其勢然也。吏人自

食而辦公事。且樂爲之爭爲之者。利在焉。故也。故吏之無良。心無公心。亦勢使之然也。官人常欲知其實。吏人常不欲官人之知事實。故官人欲知事實。甚難。官人問事於吏。吏效其說。必非其實。然必爲實形。欲爲實形。亦必稍假於實。蓋不爲實形。不能取信官人。或自能得事實。吏必多方以亂之。縱不能盡亂之。亦必稍亂之。蓋官純得事實。非吏人之利也。故官人能得事實。爲難。純以事實行之。爲尤難。

先生與蘇宰書云。某往時充員勅局。浮食是慚。惟是四方奏請。廷臣面對。有所建置更革。多下詳看。其或書生貴遊。不諳民事。輕於獻計。不知一旦施行。片紙之出。兆民蒙害。每與同官。悉意論駁。朝廷清明。常得寢廢編摩之事。稽考之勤。顧何足以當大官之膳。尚方之賜。或庶幾者。僅此可少償萬一耳。

新天子即位。執事者過聽。又復畀之荆門。某竊惟爲臣之義。進思盡忠。退思補過。倘尚未罹擯斥。得共乃事。脫或朝臣一時建請。有司失於討論。遽施行之。而反爲民害者。亦當用公心。循公理。爲百姓條析。以復於上。庶幾盡忠補過之義。郡守縣令。民之師帥。承流宣化。其職任一也。而令尤親於民。古者卽官出宰百里。上應列宿。寄命之責。固不輕矣。某託庇治下。每辱眷待之厚。苟有所見。安可不盡陳於左右。以爲萬一之助哉。比者竊見省符。責括民戶屯田。將復賣之。上失朝廷之體。下爲良農之害。甚哉計之過也。其初出監簿。陳君初官江西。因見臨江之新淦。隆興之奉新。撫之崇仁。三縣之間。有請佃沒官絕戶田者。租課甚重。罄所入不足以輸官。佃者因爲奸計。不復輸納。徒賄吏胥。以圖苟免。春夏則羣來耕獲。秋冬

則棄去逃藏。當逃藏時。固無可追尋。及羣至。則倚衆拒捍。其
強梁奸猾者如此。若其善良者。則困於官租。遂以流離死亡。
田復荒棄。由是侵耕冒佃之訟益繁。公私之弊日積。陳既被
召爲職事官。因以陳請。欲行責括。減其租課。以爲如此。則民
必樂輸。而官有實入。此其爲說。蓋未爲甚失。其初下之漕臺。
布之州縣。施行之間。已不能如建請之本旨。遂併與係省額
屯田者。一槩責括。亦鹵莽矣。蓋佃沒官絕戶田者。或是吏胥
一時紐立租課。或是農民遞互增租剗佃。故有租重之患。因
而抵負不納。或以流亡拋荒。或至侵耕冒佃。而公私俱受其
害。陳監簿之所爲建請者。特爲此也。若係省額屯田者。則與
前項事體迥然不同。其租課比之稅田。雖爲加重。然佃之者
皆是良農。老幼男女皆能力作。又諳曉耕種培灌之利便。終

歲竭力其間。所收往往多於稅田。故輸官之餘。可以自給人。自愛其爭先輸公。不肯逋負。亦優於有稅田者。又此等官田。皆有莊名。如某所居之里。則有所謂大嶺莊。有所謂精步莊。詢之他處。莫不各有莊名。故老相傳。以爲元祐間宣仁垂簾之日。捐湯沐之入。以補大農。而俾以在官之田。區分爲莊。以贍貧民。籍其名數。計其頃畝。定其租課。使爲永業。今里中之老。猶有能言宣仁上仙之年。與其月日者。歲月寢久。又相與貿易。謂之資陪。厥價與稅田相若。著令亦許其承佃。明有資陪之文。使立契字。輸牙稅。蓋無異於稅田。其名數之著於州縣簿籍者。目曰省莊。計其租入。則上而計省。下而郡縣。皆總之曰苗屯米若干。此其與逐時沒官絕戶田產。隸於常平。而俾之出賣者。豈可同年而語哉。歷時既多。展轉貿易。佃此

田者不復有當時給佃之人。目今無非資陪入戶。租課之輸。逋負絕少。郡縣供億。所賴爲多。有司因陳君之請。槩行責括。亦已踈矣。漕臺又因有出賣之請。此不審之甚者也。若沒官絕戶田產。朝廷何嘗不令出賣。惟其不售也。是以開給佃之門。亦所以勸民之耕。且使土無曠而租無虧也。今以租重之故。致前數弊。議者方建減租之策。乃不能因而推行之。而復爲出賣之說。可謂失於討論矣。且官有賣田之名。固自不美。固無買者。假令有買者。亦必不能齊一。所收之直。又安有補於縣官之調度。亦終化爲烏有耳。有司坐析無補之秋毫。徒使縣官負不美之名。憂民如此。不亦謬乎。不亦踈乎。若復及所謂屯田者。則其失又甚矣。今有屯田者。無非良農。入戶有資陪之價。著令有資陪之文。立契有牙稅之輸。租課未嘗逋。

負郡縣賴以供億。一旦官復責括而賣之。則有是田者。往往僅能自給。豈能辦錢以買此田。縱或能買。是無故而使之再出買田之價。豈不困哉。豈不冤哉。其能買者。固不百一。異時有錢以買者。必兼併豪植之家也。奪良農固有熟耕之田。以資兼併豪植之家。而使之流離困窮。啣冤茹痛。相枕籍爲溝中瘠。此何策也。版曹之勘當。都省之符下。皆不復究其本末。其事益熾。其害益滋。陳君之請。不過三縣。省符之下。計臺之奏。遂及三郡。版曹勘當。則又遍於一路。且其施行。與其建請本旨。絕相背違。真所謂字經三寫。烏焉成馬。失今不救。又將遍於天下矣。假令有成命。有司苟知其非。猶當各守其職。而爭之。况今未有成命。豈可坐縻紙札。徒嚴期會。滋吏奸以擾良農。安視下民之困。以成執事者之過計哉。門下平日愛民。

如父母憂民如疾疢。今誠爲之深究其本末。詳計其利病。陳之上府。列之計臺。丐聞於朝。俾寢其議。以便邦計。以安民心。此必門下之所樂爲也。胥吏之計。方將並緣以招賄謝。必不樂此。諒仁人君子之心。惟恐不聞吾民之疾苦。政令之利病。必不以吏胥之謀。而易天下之至計。某雖不能周知一邑之版籍。以所聞見計之。此邑之民。耕屯田者。當不下三千戶。以中農夫食七人爲率。則三七二十一。當二萬一千人。撫萬家之邑。而其良農三千戶。老稚二萬一千。一旦失職。凜凜有破家散業。流離死亡之憂也。豈仁人君子所能忍視而不爲之計者。今方收穫春榆之時。誠得亟爲剡牘。而其文書期會。姑遼緩之。以須後庚之命。使憂慮偈仄。轉爲歡心。慘悽怛悍。散爲和氣。而謳歌鼓舞。溢於田畝。遍於塗巷。不亦休哉。此非有

缺於供輸。損於調度。決不至以此獲罪於上府計臺也。仰恃愛念。敢布腹心。

又與蘇宰書云。如聞徒御戒行。將如郡邸。豈黃堂將大行寬恤之政。以厚吾民之力。爲國家培固根本。爲萬世不拔之基耶。撫字心勞。催科政拙。此陽道州所以爲當世大賢。而史家載之以爲美談者。天以斯民付之。吾君吾君。又以斯民付之。守宰故凡。張官置吏者。爲民設也。無以厚民之生。而反以病之。是失朝廷所以張官置吏之本意矣。無君子莫治野人。無野人莫養君子。朝廷官府之用。固當野人供之。今賦輸之法。斯民所當遵而不違也。違而不供。民之罪也。官從而督之。理之宜也。爲守宰者。固不可以托催科政拙之言。而置賦稅之事。一切不理。易曰。理財正辭。禁民爲非。曰義。必指簿書期會。

爲非吾所當務。此乃腐儒鄙生不聞大道。妄爲繆悠之說。以自蓋其無能者之言也。今簿書不理。吏胥因爲紊亂。爲長吏者難以稽考。吏胥與奸民爲市。使長吏無所窺尋其蹤跡。此所當深思精考。覈其本末。求其要領。乃所謂理財正辭。禁民爲非者也。簿書齊整。明白吏無所容奸。則奸民懼而弊事理。良民下戶畏事之人。不復被擾矣。若循理而治。賦輸又不能寬。上府之督責。則致爲臣而去。豈不甚公。甚正。甚榮。甚美哉。有如文文大鄉之賢善類。所宗亦必甚慰其意。以爲吾有賢子。不愧於陽道州矣。世間富貴何限。往往與草木俱腐。其能自拔而與陽道州儼駕於方策者。幾何人哉。若曰。今不得已。且屈吾平日之志。爲苟免之道。非某之所聞也。吾人當求師於往聖。昔賢有識。君子不可聽計於吏胥。吏胥者。吾之所御。

豈可反入其籠罩之中也。

先生與楊守書云。遠違色笑。倏爾經時。洽聞謳歌。益用鄉德。某自省事以來五十年矣。不知幾易太守。其賢而可稱者。惟張安國。趙景明。陳時中。錢伯同四人。殆如晨星之相望。可謂難得矣。今執事臨之。又光於諸公。邦人何幸。雖然。屬者郡政不競已甚。積弊宿蠹。殆難驅除。猾吏豪家。相爲表裏。根盤節錯。爲民蝨賊。質之淳黠。勢之強弱。相去懸絕。本非對偶。吏胥居府廷。司文案。宿留於邦君之側。以間劇勞逸。嘗吾之喜愠。以日月淹速。嘗吾之忘憶。爲之先後。緩急開闔損益。以蔽吾聰明。亂吾是非。而行其計。豪家擁高貲。厚黨與。附會左右之人。翔端緒於事外。以亂本旨。結左證於黨中。以實僞事。工爲節目。以與吏符合。而成其說。吾以異鄉之人。一旦而聽之。非

素諳其俗而府中深崇閭里之事。不接於吾之目。塗巷之言。不聞於吾之耳。被害者又淳愿柔弱。類不能自明。自達。聽斷之際。欲必得其情。而不爲所欺。此甚明者之所難也。吾雖得其情。彼尚或能爲之牽制。以格吾之施行。吾斷之速。則文疎事漏。而無以絕其辭。吾求之詳。則日引月長。而適以生其奸。况其是非曲直之未分。而嘗有以貳吾之心。疑吾之見。變亂其事實。而其情亦未易得也。一墮其計。奸惡失所。畏善良失所恃。豈不難哉。善惡之習。猶陰陽之相爲消長。無兩大之理。一人之身。善習長而惡習消。則爲賢人。反是則爲愚。一國之俗。善習長而惡習消。則爲治國。反是則爲亂。時之所以爲否泰者。亦在此而已。開闢以來。羲皇而降。聖君賢相。名卿良大夫。相與扶持封植者。善也。其所防閑杜絕者。惡也。明明在上。

者明此而已。火在天上。大有明之至也。象曰：君子以遏惡揚善。順天休命。傳亦有之。爲國家者。見惡如農夫之務去草焉。芟夷蘊崇之。絕其根本。勿使能植。則善者信矣。夫子曰：聽訟吾猶人也。必也使無訟乎。使夫子生今之世。爲今之吏。亦豈遽使人無訟哉。易有訟卦。其來久矣。不能無訟。豈唯今日若其聽訟之間。是非易位。善惡倒置。而曰自有使人無訟之道。無是理也。必使無訟之道。當於聽訟之間見之矣。君子之所。以異於人者。以其存心也。遏惡揚善。順天休命。此其存心也。與後世苟且以逃吏責。鈎距以立威者。豈可同年而語哉。舉斯心以加諸彼。使善習日長。惡習日消。惡者屈。善者信。其無訟也必矣。蒙照知之素。輒效區區。以裨萬一。

先生與黃監書云：某切見鄉來趙丈舉行社倉。弊里亦立一

倉委梭山家兄主其事某頗有所未安者昨亦嘗稟聞愚見以爲莫若爲平糴一倉以輔之乃可長久平糴則可獨行社倉未必可獨行也社倉施於常熟鄉乃可久田不常熟則歉歲之後無補於賑恤平糴則豐時可以受農民之粟無價賤傷農之患歉時可以摧富民閉廩騰價之計政使獨行可爲長利今以補社倉之所不及而彌縫其缺又兩盡善矣

先生任荆門以紹熙二年九月初領郡事吏以故例白內諸局務外諸縣必有揭示約束接賓受詞分日先生曰安用是延見僚屬如朋友推心豁然論事惟理是從先生家書有云每日同官稟事衆有所見皆得展其所懷辨爭利害於前太守唯默聽候其是非既明乃從容贊歎以養其徇公之意太守所判僚屬却回者常有之先生教民如子弟雖賤隸走卒

亦諭以理義。接賓受詞。無早暮下情。盡達無壅。故郡境之內。官吏之貪廉。民俗之習尚。忠良材武。與猾吏豪強。先生皆得之於無事之日。往時郡有追逮。皆特遣人。先生唯令訴者自執狀。以追以地。近遠立限。皆如期。即日處決。輕罪多酌人情。曉令解釋。至人倫之訟。既明。多使領元詞。自毀之以厚其俗。唯怙終不可誨化。乃始斷治。詳其文狀。以防後日反覆。久之。民情益孚。兩造有不持狀。唯對辯求決。亦有證者不召自至。問其故。曰。事久不白。共約求明。或既伏。俾各持其狀去。不復留案。嘗夜與僚屬坐。吏白有老者訴甚急。呼問之。體戰言不可解。俾吏狀之。謂其子爲羣卒所殺。先生判翌日。呈僚屬難之。先生曰。子安之不至。是凌晨追究。其子蓋無恙也。人亦服先生之明。有訴遭竊脫而不知其人。先生自出。二人姓名使

捕至訊之。伏辜盡得。所竊物還訴者。且宥其罪。使自新。因語吏曰。某所某人尤暴。吏亦莫知。翌日有訴遭奪掠者。即其人。也。乃加追治。吏大驚。郡人以爲神。初保伍之制。州縣以非急務。多不檢覈。盜賊得藏匿其間。近邊尤以爲患。先生首申嚴之。奸無所蔽。有刼僧廬鄰伍遽集擒獲。不逸一人。至是羣盜屏息。荆門素無城壁。先生以爲此自古戰爭之場。今爲次邊。在江漢之間。爲四集之地。南捍江陵。北援襄陽。東護隨郢。之。脇西當光化夷陵之衝。荆門固則四鄰有所恃。否則有背脇腹心之虞。由唐之湖陽以趨山。則其涉漢之徑。已在荆門之脇。由鄧之鄧城以涉漢。則其趨山之道。已在荆門之腹。餘有間途淺津。陂阨不能以限馬。灘瀨不能以濡軌者。所在尚多。自我出奇制勝。徼敵兵之腹脇者。亦正在此。雖四山環合。易。

於備禦義勇四千強壯可用。而倉廩藏庫之間。麋鹿可至。累議欲修築其城。憚於重費。不敢輕舉。先生審度決計。召集義勇。優給庸直。躬自勸督。役者樂趨。竭力工倍。二旬訖築。初計者議費緡錢二十萬。至是僅費緡錢五千。而土工畢。後復議成砌三重。置角臺增二小門。置敵樓衝天渠。荷葉渠。護險牆之制畢備。纔費緡錢三萬。又郡學貢院。客館官舍。衆役並興。初俗習惰。人以執役爲耻。吏爲好衣閒觀。至是此風一變。督役官吏布衣雜役。夫佐力相勉。以義不專。以威盛。役如此。而人情晏然。郡中恬若無事。荆門兩縣置壘。事力綿薄。連歲困於送迎。庫藏空竭。調度倚辦商稅。先是日差使臣暨小吏伺商人於門。檢貨給引。然後至務。務唯據引入稅。出門又覆視。官收無幾。而出入其費已多。初謂以嚴禁權杜奸弊。而門吏

取賄多所藏覆禁物亦或通行商苦重費多由僻途務入日
縮先生罷去之或曰門譏所以防奸列郡行之以爲常一旦
罷廢商冒利必有不至務者先生曰是非爾所知即日揭示
俾徑至務復減正稅援例是日稅入立增有一巨商已遵僻
途忽聞新令復出正路巡尉卒於歧捕之先生詰得其實勞
而釋之巨商感涕行旅聞者莫不以手加額誓以毋欺私相
轉告必由荆門旁觀者詰其故商曰罷三門引減援去我輩
大害不可不報德稅收增倍酒課亦如之荆門故用銅錢後
以近邊以鐵錢易之銅錢有禁而民之輸於公者尚容貼納
先生曰既禁之矣又使之輸不可即蠲之又減鈔錢罷比較
不遣人詣縣給吏札置醫院官吏民咸悅而郡吏亦貧而樂
獄卒無以自給多告罷先生以僚屬訪察得其實遂廩給之

朔望及暇日詣學講誨諸生。郡有故事。上元設齋醮黃堂。其說曰。爲民祈福。先生於是會吏民講洪範。歛福錫民一章。以代醮事。發明人心之善。所以自求多福者。莫不曉然有感於中。或爲之泣。湖北諸郡軍士多逃徙。視官府如傳舍。不可禁止。緩急無可使者。先生病之。乃信捕獲之。賞重。奔竄之。刑又數。閱射中者。受賞役之。加庸直。無飢寒之憂。相與悉心弓矢。逸者絕少。他日兵官按閱。獨荆門整習。他郡所無。先生平時按射不止於兵伍。郡民皆得而與中。亦同賞薦舉。其屬不限流品。嘗曰。古者無流品之分。而賢不肖之辨嚴。後世有流品之分。而賢不肖之辨畧。先生之家居也。鄉人苦旱。羣禱莫應。有請於先生。乃除壇山巔。陰雲已久。及致禱。大雨隨至。荆門亦旱。先生每有祈。必疎雨隨車。郡民異之。治化孚洽。久而益。

著既踰年。筭不施。至於無訟。相保相愛。閭里熙熙。人心敬
向。日以加厚。吏卒亦能相勉。以義視官事。如其家事。識者知
其爲郡有出於政刑號令之表者矣。諸司交章論薦。丞相周
公必大嘗遺人書有曰。荆門之政。于以驗躬行之效。

陸子學譜卷之四

南昌萬承蒼訂

後學臨川李紱編

陸川龐嶼校

友教

史記儒林傳稱七十子之徒。大者爲師傅。卿相。小者友教。士大夫所謂大小。就其位遇言之也。陸子之學。未嘗大展其澤之所及。友教爲多。自朱子往復而外。國學觀摩。勅局編纂。一時聚處賢豪。若機仲元善輩。並受切磋之益。他若尤文簡。座主也。趙忠定。呂伯恭。皆禮部同考官。當仁不讓。時有諍言。豈非直諒多聞。古之三益哉。述友教爲一卷。先生於呂伯恭。趙子直。皆中進士時同考官也。然切磋甚至。

嘗與伯恭書云。往歲先判府寃宥。願比於執事。而卒不果。既欲展慰。又不果。去冬因東陽郭伯清宅人。嘗拜疏畧申慰誠。計必徹聽。某前此欲一再瞻見。殊未得款聽教誨。竊惟執事聰明篤厚。人人自以爲不及。樂教導人。樂成人之美。近世鮮見如某疎愚。所聞於朋友間。乃辱知爲最深。苟有所懷。義不容默。天下事理固有愚夫愚婦之所與知。而大賢君子不能無蔽。元獻晏公尹南京日。文正范公居母夫人憂。元獻屈致教導諸生。文正孳孳誨誘不倦。從之遊者多有聞於時。竊聞執事者儼然在憂服之中。而戶外之屨亦滿。伯夷柳下惠孟子雖言其聖。至所願則學孔子。文正雖近世大賢。其居憂教授。豈大賢君子之所蔽乎。執事之所爲標的者。宜不在此。執事天資之美。學問之博。此事之不安於心。未契於理。要不待

煩說博引而後喻竊聞凡在交遊者皆不爲執事安諒執事之心亦必不自安也夫苟不安何憚而不幡然改之乎於此而改其所以感發諸生亦不細矣舜聞善若決江河沛然莫之能禦君子之過及其更也人皆仰之伏願不憚改過以全純孝之心不勝至願

又嘗與趙子直書論吏治之弊云比來道路田畝皆鼓舞盛德汙吏黠胥頗亦斂戢鄉懷疑者皆已冰釋矣然所在積弊非一日可去要當耐久緝理想大賢之心亦未易滿也大抵益國裕民之心在吾人固非所乏弊之難去者多在簿書名數之間此奸貪寢食出沒之處而吾人之所疎者比嘗攻究此等頗得其力蓋事節甚多難以泛攻須要於一事精熟得其要領則其他却有緣通類舉之理所謂一堵牆百堵調撫

之秋輸鄉者病於加合之無藝。又受領官吏高下其手。輕重不均。有臨川陳知縣鼎者。議革其弊。以爲盡去之。則州用軍糧名會等米。皆取於此。有不可闕。於是約其類。每斗加五十合。而令兩斛輸三斛。官得以足。民亦不病。而又無輕重不均之弊。民大便之。陳知縣既去。後來又於三斛之上。又加斛面。曾有徐提舉者。甚愛民。一日不測入倉。百姓皆訴斛面太重。徐提舉方責罵受領官吏。官吏輒以州用軍糧名會米爲斛。提舉不能加詰。不知先已兩斛納三斛。已是算足。州用軍糧名會等米矣。所謂斛面者。又在此外。尅歛大抵不知節目。名數之詳。鮮有不爲其所欺者。斛面之弊。去年趙使君稍稍正之。民已大悅。今歲撫雖小稔。而連雨阻穫。損折者已十三四。今未穫者尚多。已穫者亦未得春造。苗限自當有展。而州縣

殊無寬假之意。稅租折變著令以納月上旬時估中價準折而折穀折糲。侵民之直。至於再倍。其在今歲尤爲可念。列具詳細數納呈。幸少留意觀之。亦庶幾一堵墻百堵調者。世儒耻及簿書。獨不思伯禹作貢成賦。周公制國計。孔子會計當。洪範八政首食貨。孟子言王政亦先治民產正經界。果可耻乎。官吏日以貪猥。弊事日以衆多。豈可不責之儒者。張官置吏。所以爲民。而今官吏日增術以朘削之。如恐不及。麀邦本病國脉。無復爲君愛民之意。良可歎也。百姓足君孰與不足。損下益上謂之損。損上益下謂之益。理之不易者也。而至指以老生常談。良可歎也。大著盡公守正。今世鮮儷。而諸公皆議其不密。議者之心固有大病。而在大著不爲無疵。語有失言之戒。易有謹密之辭。不可不察也。別紙所錄利便。不可使

胥吏見之。

先生與朱元晦書云、黃易二生歸、奉正月十四日書、備承改
歲動息、慰浣之劇、不得嗣問、倏又經時、日深馳鄉、聞已赴闕
奏事、何日對敷、伏想大攄素蘊、爲明主忠言、動悟淵衷、以幸
天下、恨未得即聞緒餘、沃此傾渴、外間傳聞、留中講讀、未知
信否、誠得如此、豈勝慶幸、鄉人彭世昌得一山、在信之西境、
距敝廬兩舍而近、實龍虎山之宗、巨陵特起、厯然如象、名曰
象山、山間自爲原塢、良田清池、無異平野、山澗合爲瀑流、垂
注數里、兩崖有蟠松怪石、却畧偃蹇、中爲茂林、瓊瑤冰雪、傾
倒激射、飛灑映帶於其間、春夏流壯、勢如奔雷、木石自爲梯
階、可沿以觀、佳處與玉淵臥龍未易優劣、往歲彭子結一廬、
以相延、某亦自爲精舍於其側、春間携一姪二息讀書其上、

又得勝處爲方丈以居前挹閩山奇峰萬疊後帶二溪下赴彭蠡學子亦稍稍結茅其旁相從講習此理爲之日明舞雩詠歸千載同樂某昔年兩得侍教康廬之集加欵於鵝湖然猶鹵莽淺陋未能成章無以相發甚自愧也比日少進甚思一侍函丈當有啓助以卒餘教尚此未能登高臨流每用悵惘往歲覽尊兄與梭山家兄書嘗因南豐使人僭易致區區蒙復書許以卒請不勝幸甚古之聖賢惟理是視堯舜之聖而詢於蒟蒻曾子之易簣蓋得於執燭之童子蒙九二曰納婦吉言苟當於理雖婦人孺子之言所不棄也孟子曰盡信書不如無書吾於武成取二三策而已矣或乖理致雖出古書不敢盡信也智者千慮或有一失愚者千慮或有一得人言豈可忽哉梭山兄謂太極圖說與通書不類疑非周子所

爲。不。然。則。或。是。其。學。未。成。時。所。作。不。然。則。或。是。傳。他。人。之。文。
後。人。不。辨。也。蓋。通。書。理。性。命。章。言。中。焉。止。矣。二。氣。五。行。化。生。
萬。物。五。殊。二。實。二。本。則。一。曰。一。曰。中。即。太。極。也。未。嘗。於。其。上。
加。無。極。字。動。靜。章。言。五。行。陰。陽。陰。陽。太。極。亦。無。無。極。之。文。假。
令。太。極。圖。說。是。其。所。傳。或。其。少。所。作。則。作。通。書。時。不。言。無。極。
蓋。已。知。其。說。之。非。矣。此。言。殆。未。可。忽。也。兄。謂。梭。山。急。迫。看。人。
文。字。未。能。盡。彼。之。情。而。欲。遽。中。已。意。是。以。輕。於。立。論。徒。爲。多。
說。而。未。必。果。當。於。理。大。學。曰。無。諸。已。而。後。非。諸。人。人。無。古。今。
智。愚。賢。不。肖。皆。言。也。皆。文。字。也。觀。兄。與。梭。山。之。書。已。不。能。酬。
斯。言。矣。尚。何。以。責。梭。山。哉。尊。兄。向。與。梭。山。書。云。不。言。無。極。則。
太。極。同。於。一。物。而。不。足。爲。萬。化。根。本。不。言。太。極。則。無。極。淪。於。
空。寂。而。不。能。爲。萬。化。根。本。夫。太。極。者。實。有。是。理。聖。人。從。而。發。

明之耳。非以空言立論。使後人簸弄于頰舌紙筆之間也。其
爲萬化根本。固自素定。其足不足。能不能。豈以人言不言之
故耶。易大傳曰。易有太極。聖人言有。今乃言無。何也。作大傳
時。不言無極。太極何嘗同於一物。而不足爲萬化根本也。洪
範五皇極。列在九疇之中。不言無極。太極亦何嘗同于一物。
而不足爲萬化根本耶。太極固自若也。尊兄只管言來言去。
轉加糊塗。此真所謂輕于立論。徒爲多說。而未必果當於理
也。兄號句句而論。字字而議。有年矣。宜益工益密。立言精確。
足以悟疑辯惑。乃反疎脫如此。宜有以自反矣。後書又謂無
極。即是無形。太極即是有理。周先生恐學者錯認太極。別爲
一物。故著無極二字以明之。易大傳曰。形而上者。謂之道。又
曰。一陰一陽之謂道。一陰一陽。已是形而上者。况太極乎。曉

文義者舉知之矣。自有大傳。至今幾年。未聞有錯認太極別
爲一物者。設有愚謬。至此奚啻不能以三隅反。何足上煩老
先生。特地於太極上加無極二字。以曉之乎。且極字亦不可
以形字釋之。蓋極者中也。言無極。則是猶言無中也是。奚可
哉。若懼學者泥於形器。而申釋之。則宜如詩言上天之載。而
於下贊之曰。無聲無臭。可也。豈宜以無極字加於太極之上。
朱子發謂濂溪得太極圖於穆伯長。伯長之傳出於陳希夷。
其必有攷。希夷之學。老氏之學也。無極二字。出於老子。知其
雄章。吾聖人之書所無有也。老子首章言無名天地之始。有
名萬物之母。而卒同之。此老氏宗旨也。無極而太極。即是此
旨。老氏學之不正。見理不明。所蔽在此。兄於此學用力之深。
爲日之久。曾此之不能辨。何也。通書中焉止矣。之言。與此昭

然不類。而兄曾不之察。何也。太極圖說以無極二字冠首。而通書終篇未嘗一及無極字。二程言論文字至多。亦未嘗一及無極字。假令其初實有是圖。觀其後來未嘗一及無極字。可見其道之進。而不自以爲是也。兄今考訂註釋。表顯尊信如此。其至恐未得爲善祖述者也。潘清逸詩文可見矣。彼豈能知濂溪者。明道伊川親師承濂溪。當時名賢居潘右者。亦復不少。濂溪之誌。卒屬於潘。可見其子孫之不能世其學也。兄何據之篤乎。梭山兄之言。恐未宜忽也。孟子與墨者夷之辯。則據其愛無差等之言。與許行辯。則據其與民並耕之言。與告子辯。則據其義外與人性無分於善不善之言。未嘗泛爲料度之說。兄之論辯。則異於是。如某今者所論。則皆據尊兄書中要語。不敢增損。或稍有用尊兄泛辭以相繩糾者。亦

差有證據。抑所謂夫民今而後得反之也。兄書令梭山寬心游意。反復二家之言。必使於其所說。如出於吾之所爲者。而無纖芥之疑。然後可以發言立論。而斷其可否。則其爲辯也。不煩。而理之所在。無不得矣。彼方深疑其說之非。則又安能使之如出於其所爲者。而無纖芥之疑哉。若其如出於吾之所爲者。而無纖芥之疑。則無不可矣。尚何論之可立。否之可斷哉。兄之此言。無乃亦少傷於急迫。而未精邪。兄又謂一以急迫之意求之。則於察理已不能精。而於彼之情又不詳盡。則徒爲紛紛。雖欲不差。不可得已。殆夫子自道也。向在南康。論兄所解。告子不得於言。勿求於心。一章非是。兄令某平心觀之。某嘗答曰。甲與乙辯。方各是其說。甲則曰。願某乙平心也。乙亦曰。願某甲平心也。平心之說。恐難明白。不若據事論。

理可也。今此急迫之說。寬心游意之說。正相類耳。論事理。不
必以此等壓之。然後可明也。梭山氣稟寬緩。觀書未嘗草草。
必優游諷詠。耐久紬繹。今以急迫指之。雖他人亦未諭也。夫
辯是非別邪正。決疑似。固貴於峻潔明白。若乃料度羅織文
致之辭。願兄無易之也。梭山兄所以不復致辯者。蓋以兄執
已之意甚固。而視人之言甚忽。求勝不求益也。某則以爲不
然。尊兄平日惓惓於朋友。求箴規切磋之益。蓋亦甚至。獨羣
雌孤雄。人非惟不敢以忠言進於左右。亦未有能爲忠言者。
言論之橫出。其勢然耳。向來相聚。每以不能副兄所期爲愧。
比者自謂少進。方將圖合并而承教。今兄爲時所用。進退殊
路。合并未可期也。又蒙許其吐露。輒寓此少見區區。尊兄不
以爲然。幸不憚下教。政遠惟爲國保愛。以需柄用以澤天下。

先生答朱元晦第二書云。伏自夏中拜書。尋聞得對方深贊。喜冒疾遽興。重爲駭歎。賢者進退。綽綽有裕。所甚惜者。爲世道耳。承還里第。屢欲致書。每以冗奪。徒積傾馳。江德功人至。奉十一月八日書。備承作止之詳。慰浣良劇。比閱邸報。竊知召命不容辭免。莫須更一出否。吾人進退。自有大義。豈直避嫌畏譏而已哉。前日面對。必不止於職守所及。恨不得與聞至言。後便尚可垂教否。前書條析所見。正以疇昔負兄所期。比日少進。方圖自贖耳。來書誨之諄復。不勝幸甚。愚心有所未安。義當展盡。不容但已。亦尊兄教之之意也。近浙間有後生貽書見規。以爲吾二人者。所習各已成熟。終不能以相爲。莫若置之勿論。以俟天下後世之自擇。鄙哉言乎。此輩凡陋。沉溺俗學。悖戾如此。亦可憐也。人能弘道。非道弘人。此理在。

宇宙間固不以人之明不明行不行而加損然人之爲人則
抑有其職矣。垂象而覆物者天之職也。成形而載物者地之
職也。裁成天地之道輔相天地之宜以左右民者人君之職
也。孟子曰。幼而學之壯而欲行之所謂行之者行其所學以
格君心之非引其君以當道與其君論道經邦燮理陰陽使
斯道達乎天下也。所謂學之者從師親友讀書考古學問思
辨以明此道也。故少而學道壯而行道者士君子之職也。吾
人皆無常師周旋於羣言淆亂之中俯仰參求雖自謂其理
已明安知非私見說若雷同相從一唱百和莫知其非此
所甚可懼也。幸而有相疑不合在同志之間正宜各盡所懷
力相切磋期歸於一是之地。大舜之所以爲大者善與人同
樂取諸人以爲善聞一善言見一善行若決江河沛然莫之

能禦吾人之志。當何求哉。惟其是而已矣。疇昔明言善議。拳服膺而勿失。樂與天下共之者。以爲是也。今一旦以切磋而知其非。則棄前日之所習。勢當如出陷穽。如避荆棘。惟新之念。若決江河。是得所欲而遂其志也。此豈小智之私。鄙陋之習。榮勝耻負者所能知哉。弗明弗措。古有明訓。敢悉布之。尊兄平日論文。甚取曾南豐之嚴健。南康爲別前一夕。讀尊兄之文。見其得意者。必簡健有力。每切敬服。嘗謂尊兄才力如此。故所取亦如此。今閱來書。但見文辭繳繞。氣象徧迫。其致辯處。類皆遷就牽合。甚費分疏。終不明白。無乃爲無極所累。反困其才耶。不然。以尊兄之高明。自視其說。亦當如黑白之易辨矣。尊兄嘗曉陳同父云。欲賢者百尺竿頭。進取一步。將來不作三代以下人物。省得氣力爲漢唐分疏。即更脫灑。

磊落今亦欲得尊兄進取一步莫作孟子以下學術省得氣力爲無極二字分疏亦更脫灑磊落古人質實不尚智巧言論未詳事實先著知之爲知之不知爲不知所謂先知覺後知先覺覺後覺者以其事實覺其事實故言即其事事即其言所謂言顧行行顧言周道之衰文貌日勝事實湮於意見與訓蕪於辨說揣摩量模寫之工依倣假借之似其條畫足以自信其習熟足以自安以子貢之達又得夫子而師承之尚不免此多學而識之之見非夫子叩之彼固晏然而無疑先行之訓子欲無言之訓所以覺之者屢矣而終不悟顏子既歿其傳顧在曾子蓋可觀已尊兄之才未知其與子貢如何今日之病則有深於子貢者尊兄誠能深知此病則來書七條之說當不待條析而自解矣然相去數百里脫或未能自

克淹回舊習則不能無遺恨。請卒條之來書。本是主張無極二字。而以明理爲說。其要則曰。於此有以灼然實見太極之真體。某竊謂尊兄未曾實見太極。若實見太極。上面不必更加無極字。下面必不更着真體字。上面加無極字。正是疊床上之床。下面着真體字。正是架屋下之屋。虛見之與實見。其言固自不同也。又謂極者。正以其究竟至極。無名可名。故特謂之太極。猶曰舉天下之至極。無以加此云耳。就令如此。又何必更於上面加無極字也。若謂欲言其無方所。無形狀。則前書固言宜如詩言上天之載。而於其下贊之曰。無聲無臭。可也。豈宜以無極字加於太極之上。繫辭言神無方矣。豈可言無神言易無體矣。豈可言無易。老氏以無爲天地之始。有爲萬物之母。以常無觀妙。以常有觀徼。直將無字搭在上面。

正是老氏之學。豈可諱也。惟其所蔽在此。故其流爲任術數。
爲無忌憚。此理乃宇宙之所固有。豈可言無。若以爲無。則君
不君。臣不臣。父不父子。不子矣。楊朱未遽無君。而孟子以爲
無君。墨翟未遽無父。而孟子以爲無父。此其所以爲知言也。
極亦此理也。中亦此理也。五居九疇之中。而曰皇極。豈非以
其中而命之乎。民受天地之中以生。而詩言立我蒸民。莫匪
爾極。豈非以其中命之乎。中庸曰中也者。天下之大本也。和
也者。天下之達道也。致中和。天地位焉。萬物育焉。此理至矣。
外此。豈更復有太極哉。以極爲中。則爲不明理。以極爲形。乃
爲明理乎。字義固有一字而數義者。用字則有專一義者。有
兼數義者。而字之指歸。又有虛實。虛字則但當論字義。實字
則當論所指之實。論其所指之實。則有非字義所能拘者。如

元字有始義有長義有大義。坤五之元。吉。屯之元。亨。則是虛字。專爲大義。不可復以他義參之。如乾元之元。則是實字。論其所指之實。則文言所謂善。所謂仁。皆元也。亦豈可以字義拘之哉。極字亦如此。太極皇極。乃是實字。所指之實。豈容有二。充塞宇宙。無非此理。豈容以字義拘之哉。中。即至理。何嘗不兼至義。大學文言皆言知至。所謂至者。即此理也。語讀易者曰。能知太極。即是知至。語讀洪範者曰。能知皇極。即是知至。夫豈不可。蓋同指此理。則曰極。曰中。曰至。其實一也。一極備凶。一極無凶。此兩極字。乃是虛字。專爲至意。却使得極者至極而已。於此用而已字。方用得當。尊兄最號爲精通。詰訓文義者。何爲尚惑於此。無乃理有未明。正以太泥而反失之乎。至如直以陰陽爲形器。而不得爲道。此尤不敢聞命。易之

爲道一陰一陽而已。先後始終動靜晦明上下進退往來開闔盈虛消息長幼尊卑貴賤表裏隱顯向背順逆存亡得喪出入行藏何適而非一陰一陽哉。奇耦相尋變化無窮。故曰其爲道也。屢遷變動不居。周流六虛上下無常。剛柔相易不可爲典要。惟變所適。說卦曰。觀變於陰陽而立卦。發揮於剛柔而生爻。和順於道德而理於義。窮理盡性以至於命。又曰。昔者聖人之作易也。將以順性命之理。是以立天之道曰陰與陽。立地之道曰柔與剛。立人之道曰仁與義。下繫亦曰易之爲書也。廣大悉備。有天道焉。有人道焉。有地道焉。兼三才而兩之。故六六者非他。三才之道也。今顧以陰陽爲非道。而直謂之形器。其孰爲昧於道器之分哉。辯難有要領。言辭有指歸。爲辯而失要領。觀言而迷指歸。皆不明也。前書之辯其

要領在無極二字尊兄確意主張。曲爲飾說。既以無形釋之。又謂周子恐學者錯認太極別爲一物。故着無極二字以明之。某於此見得尊兄只是強說來由。恐無是事。故前書舉大傳一陰一陽之謂道。形而上者謂之道。兩句以見粗識文義者。亦知一陰一陽即是形而上者。必不至錯認太極別爲一物。故曰况太極乎。此其指歸本自明白。而兄曾不之察。乃必見誣以道上。別有一物爲太極。通書曰中者和也。中節也。天下之達道也。聖人之事也。故聖人立教。俾人自易其惡。自至其中而止矣。周子之言中如此。亦不輕矣。外此豈更別有道理。乃不得比虛字乎。所舉理性命章五句。但欲見通書言中言一而不言無極耳。中焉止矣。一句不妨自是斷章。兄必見誣以屬之下文。兄之爲辯。失其指歸。大率類此。盡信書不如

無書其實深信孟子之言。前書釋此段亦多援據古書。頗不信無極之說耳。兄遽坐以直黜古書爲不足信。兄其深文哉。大傳洪範毛詩周禮與太極圖說。孰古以極爲形而謂不得爲中。以一陰一陽爲器而謂不得爲道。此無乃少黜古書爲不足信而微任胸臆之所裁乎。來書謂若論無極二字。乃是周子灼見道體。迥出常情。不顧旁人是非。不計自己得失。勇往直前。說出人不敢說底道理。又謂周子所以謂之無極。正以其無方所無形狀。誠令如此。不知人有甚不敢道處。但加之太極之上。則吾聖門正不肯如此道耳。夫乾確然示人易矣。夫坤隤然示人簡矣。太極何嘗隱於人哉。尊兄兩下說無說有。不知洩漏得多少。如所謂太極真體不傳之秘。無物之前。陰陽之外。不屬有無不落方體。迥出常情。超出方外等語。

莫是曾學禪宗。所得如此。平時既私其說。以自妙。及教學者。則又徃徃秘此。而多說文義。此洩漏之說所從出也。以實論之。兩頭都無着實。彼此只是葛藤。未說氣質不美者。樂寄此以神其姦。不知繫絆多少。好氣質底學者。既以病已。又以病人。殆非一言一行之過。兄其毋以久習於此。而重自反也。區區之忠。竭盡如此。流俗無知。必謂不遜。書云。有言逆於汝心。必求諸道。諒在高明。正所樂聞。若猶有疑。願不憚下教。政遠惟爲國自愛。

其第三書云。徃歲經筵之除。士類胥慶。延歧以俟。吾道之行。乃復不究起賢之禮。使人重爲慨歎。新天子即位。海內屬目。然罷行陞黜。卒多人情之所未諭者。羣小駢肩而騁。氣息怫然。諒不能不重勤者。長者憂國之懷。某五月晦日。拜荆門之

命。命下之日。實三月二十八日。替黃元章闕。尚三年半。願有以教之。首春借兵之還。伏領賜報。備承改歲動息。慰浣之劇。惟其不度。稍獻愚忠。未蒙省察。反成唐突。謙抑非情。督過深矣。不勝惶恐。向蒙尊兄促其條析。且有無若令兄遽斷來章之戒。深以爲幸。別紙所謂我日斯邁。而月斯征。各尊所聞。各行所知。亦可矣。無復望其必同也。不謂尊兄遽作此語。甚非所望。君子之過也。如日月之食焉。過也。人皆見之。及其更也。人皆仰之。通人之過。雖微箴藥。久當自悟。諒今尊兄必渙然於此矣。願依末光。以卒餘教。

先生與辛幼安書云。輒有區區。欲效芹獻。伏惟少留聰明。賜之是正。竊見近時有議論之蔽。本出於小人之黨。欲爲容奸。廋慝之地。而飾其辭說。托以美名。附以古訓。要以利害。雖資。

質之美。心術之正者。苟思之不深。講之不詳。亦往往爲其所惑。此在高明。必已洞照本末。而某私憂過計。未能去懷。敢悉布之。且以求教。古人未嘗不言寬。寬也者。君子之德也。古之賢聖。未有無是心。無是德者也。然好善而惡不善。好仁而惡不仁。乃人心之用也。遇惡揚善。舉直錯枉。乃寬德之行也。君子固欲人之善。而天下不能無不善者。以害吾之善。固欲人之仁。而天下不能無不仁者。以害吾之仁。有不仁不善爲吾之害。而不有以禁之。治之。去之。則善者不可以伸。仁者不可以遂。是其去不仁。乃所以爲仁。去不善。乃所以爲善也。故曰。爲國家者。見惡如農夫之務去草焉。芟夷蘊崇之。絕其本根。勿使能殖。則善者信矣。夫五刑五用。古人豈樂施此於人哉。天討有罪。不得不然耳。是故大舜有四裔之罰。孔子有兩觀

之誅善觀大舜孔子寬仁之實者於四裔兩觀之間而見之
矣近時之言寬仁者則異於是蓋不究夫寬仁之實而徒欲
爲容奸廋慝之地殆所謂以不禁奸邪爲寬大縱釋有罪爲
不苛者也罪疑惟輕罪而有疑固宜惟輕與其殺不辜寧失
不經謂罪疑者也使其不經甚明而無疑則天討所不容釋
豈可失也宥過無大刑故無小使在趨走使令之間簿書期
會之際偶有過誤宥之可也若其貪黷姦宄出於其心而至
於傷民蠹國則何以宥爲於其所不可失而失之於其所不
可宥而宥之則爲傷善爲長惡爲悖理爲不順天殆非先王
之政也自古張官置吏所以爲民爲之囹圄爲之械繫爲之
鞭箠使長吏操之以禁民爲非去其不善不仁者而成其善
政仁化懲其邪惡除亂禁暴使上之德意布宣於下而無所

壅底。今天子愛養之方。丁寧於誥旨。勤卹之意。焦勞於宵旰。
 賢牧伯班宣。惟勤勞來不怠。列郡成風。咸尚慈恕。而縣邑之
 間。貪饕矯虔之吏。方且用吾君禁非懲惡之具。以逞私濟欲。
 置民於囹圄。械繫鞭箠之間。殘其支體。竭其膏血。頭會箕歛。
 槌骨瀝髓。與奸胥猾徒。厭飫咆哮。其上巧爲文書。轉移出沒。
 以欺上府。操其奇贏。與上府之左右。締交合黨。以蔽上府之
 耳目。田畝之民。劫於刑威。小吏下片紙。因累累如驅羊。劫於
 庭廡。械繫之威。心悸股慄。箠楚之慘。號呼顙天。隳家破產。質
 妻鬻子。僅以自免。而曾不得執一字之符。以赴愬於上上之
 人。或浸淫聞其髣髴。欲加究治。則又有庸鄙淺陋。明不燭理。
 志不守正之人。爲之緩頰。敷陳仁愛寬厚有體之說。以杜吾
 窮治之意。游揚其文具偽貌。誕謾之事。以掩其罪惡之迹。遂

使明天子勤恤之意。牧伯班宣之誠。壅底而不達。百里之宰。真承宣撫字之地。乃復轉而爲豺狼蝨蟲之區。日以益甚。不可驅除。豈不痛哉。若是者。其果可宥乎。果可失乎。至於是而。又泛言寬仁之說。以逆蔽吾窮治之途。則其滋害遺毒。縱惡傷和。豈不甚哉。其與古人寬仁之道。豈不戾哉。今之貪吏。每以應辦財賦爲辭。此尤不可不辯。今日邦計誠不充裕。賦取於民者。誠不能不益於舊制。居計省者。誠能推支費浮衍之由。察收歛滲漏之處。深求節約檢尼之方。時行施舍已責之政。以寬民力。以厚國本。則於今日誠爲大善。若未能爲此。則亦誠深計遠慮者之所惜。然今日之苦於貪吏者。則不在此。使吏果不貪。則因今之法。循今之例。以賦取於民。民猶未甚病也。今貪吏之所取。供公上者無幾。而入私囊者。或相十百。

或相千萬矣。今縣邑所謂應辦月鮮歲鮮者。固多在常賦之外。然考其所從出。則逐處各有利源所在。雖非著令之所許。而因循爲例。民亦視以爲常。而未甚病也。利源有優狹。優者應辦爲易。狹者應辦差難。然通而論之。優者多。狹者少。若循良之吏。則雖在利源狹處。亦寧書下考。不肯病民。今之貪吏。雖在利源優處。亦啓無厭之心。搜羅既悉。而旁緣無藝。張奇名以巧取。持空言以橫索。無所不至。方且託應辦之名。爲缺乏之說。以欺其上。顧不知事實不可掩。明者不可欺。通數十年之間。取其廉而能者。與其貪之尤者而較之。其爲應辦則同。而其賦取誅求於民者。或相千萬而不啻。此貪吏之所借以爲說。而欺上之人者。最不可不察也。貪吏害民。害之大者。而近時持寬仁之說者。乃欲使監司郡守不敢按吏。此愚之

所謂議論之蔽而憂之未能去懷者也不識執事以爲如何
今江西繫安撫修撰是賴願無搖於鄙陋之說以究寬仁之
實使聖天子愛養之方勤恤之意無遠不暨無幽不達而執
事之舊節素守無所屈撓不勝幸甚

先生與李省幹書云某試吏於此頗益自信此學之不可須
臾離也有朋自遠方來乃所大願承有意相與切磋乎此敬
延跂俟之平甫舊相從恨其端緒未明未知所以用力今此
又交一臂而去每爲平甫不滿此學之不明千有五百餘年
矣異端充塞聖經榛蕪質美志篤者尤爲可惜何時共講以
快此懷未相見間倘有所疑以片紙寓諸郵筒可也蓋先生
最喜講習或以全不講學疑之亦過矣

先生與李省幹第二書云居今之時而尚友方策取友當世

亦已難矣。足下求友之意切矣。顧不知迂拙之人。果足以副足下所期否乎。鄙文數篇錄往。幸熟復而審思之。毋徒徇其名。而不察其實。乃所願望。未相見間。或有未當於足下之意者。願索言之。亦惟其是而已矣。愚見所到。固當傾倒。正不必以世俗相欺也。

先生歸自臨安。湯倉使思謙來訪。因言風俗不美。先生曰。乍歸方欲與後生說些好話。然此事亦由天。亦由人。湯云。如何由天。曰。且如三年一次科舉。萬一中者。篤厚之人多。浮薄之人少。則風俗自此而厚。不然。只得一半。篤厚之人。或三四個。風俗猶自庶幾。不幸篤厚之人。無幾。或全是浮薄之人。則後生從而視儆。風俗日以敗壞。湯云。如何亦由人。曰。監司守令。便是風俗之宗主。只如院判在此。毋只惟位高爵重。旗旄導

前騎卒擁後者是崇是敬。陋巷茅茨之間有篤敬忠信好學之士。不以其微賤而知崇敬之。則風俗庶幾可回矣。湯再三稱善。次日謂幕僚曰。陸丈近至城。何不去聽說話。幕僚云。恐陸丈門戶高峻。議論非某輩所能喻。湯云。陸丈說話甚平正。試往聽看。某於張呂諸公皆相識。然如陸丈說話自是不同。先生答陳君舉書云。丁未之冬。失於一見。尺書往復。莫遂輸寫。比年山居益左。知舊消息。徃徃濶絕。徒積傾馳。遣人臨存。辱以書幣。備承近日動息。慰浣何量。以尊兄之才之美。下問之勤。懇然情實。真以能問於不能。以多問於寡。尤用降歎。世習靡敝。固無可言。以學自命者。又復錮於私見。蔽於私見。却鍼拒砭。厚自黨與。假先訓。割形似。以自附。益顧不知其實背馳久矣。天以是理畀人。而舉世莫任其責。則人極殆不立矣。

陸子學言 卷四
永思及此益切悼懼忘其駑蹇以自效竭此某所不敢不勉
著大公以滅私昭至信以熄僞非尊兄尚誰望老矣之論未
敢聞也傅子淵已至衡陽得其書謂亦已相聞矣子淵人品
甚高非餘子比也

嚴松錄先生語云先生屢稱傅子淵之賢因言比陳君舉自
湖南漕臺遣書幣下問來書云某老矣不復見諸事功但欲
結果身分耳先生畧舉答書因說近得傅子淵與君舉書煞
好若子淵切磋不已君舉當有可望也但子淵書中有兩句
云是則全掩其非非則全掩其是亦爲抹出

嚴松所錄又云有傅黃元吉別長沙陳君舉有詩送行云荷
君來意固非輕曾未深交意便傾說到七篇無欠少學從三
畫已分明每嗟自昔傷標致頗欲從今近老成爲謝荆門三

益友何時尊酒話平生。先生切聞子淵與君舉切磋。又起君
舉之疑。得黃元吉君舉方信子淵之學。松曰元吉之學却在
子淵之上。先生曰元吉得老夫鍛煉之力。元吉從老夫十五
年前數年病在逐外。中間數年換入一意見窠窟去。又數年
換入一安樂窠窟去。這一二年老夫痛加鍛煉。似覺壁立無
由近傍。元吉善學不敢發問。遂誘致諸處後生來授學。却教
諸生致問。老夫一一爲之問駁。元吉一旦從旁忽有所省。此
元吉之善學。



